

তৃতীয় অধ্যায়

পশ্চিমবঙ্গের নাটকে বাংলাদেশের মুক্তিযুদ্ধের প্রতিফলন

পশ্চিমবঙ্গের নাটকে বাংলাদেশের মুক্তিযুদ্ধের প্রতিফলন

দীর্ঘ পরাধীনতার শৃঙ্খল মোচন করে স্বাধীনতা প্রাপ্তি ছিল দীর্ঘ সংগ্রাম ও উন্মুক্ত মনে নিজেদের মেলে ধরার অদম্য ইচ্ছার ফলশ্রুতি। ১৯৪৭-এ স্বাধীনতা এসেছে ঠিকই, কিন্তু সঙ্গে এসেছে দেশের বিভাজন। যে বিভাজন কেবল ভূমির নয়, মানুষের মনেরও। শতাব্দী প্রাচীন 'বিবিধের মাঝে মিলন মহান' বাণী তুলে ধরা দেশকেই দেখতে হল বিভাজনের রাজনীতি। যে বিভাজন হয়েছিল বৃহত্তর দুটি ধর্ম হিন্দু ও মুসলমান-এর স্বাধিকার রক্ষাকে কেন্দ্র করে। স্বাধীনতা পরবর্তী রাজনৈতিক ক্ষমতার অধিকার কাদের হাতে থাকবে, সেই দ্বন্দ্বের অন্তিম পরিণতি দেশভাগের (১৯৪৭) মাধ্যমে নিজেদের ক্ষমতায়ন প্রতিষ্ঠা। এই দেশভাগের ফলশ্রুতি ছিল ইসলামিক রাষ্ট্র হিসেবে পাকিস্তানের গঠন। খুব অদ্ভুতভাবে তৈরি হয়েছিল এই পাকিস্তান রাষ্ট্রটি—ভারতবর্ষের দুই প্রান্তের দুটি প্রদেশ পাঞ্জাবের পশ্চিমাংশ এবং বাংলার পূর্বাংশ নিয়ে। ফলে পাকিস্তানের দুই প্রান্তের বাসিন্দাদের ধর্ম যদিও ছিল এক, কিন্তু তাদের ভাষা, জাতি, সংস্কৃতির মধ্যে ছিল ভারত-ব্যবধান। ফলে নবগঠিত এই দেশের দুই উপকূলের মানুষের মানসিক দূরত্ব একে অপরের 'সেন্টিমেন্ট' বুঝতে অন্তরায় সৃষ্টি করে। স্বাধীনতা লাভের পর যেখানে ভারতবর্ষ নিজেকে ধর্ম-বর্ণ-জাতি-ভাষা-সংস্কৃতি নিরপেক্ষভাবে প্রতিষ্ঠা দিতে সচেষ্ট হয়েছে, সেখানে পাকিস্তান প্রথম থেকেই কটরপন্থী মনোভাবের পরিচয় দিয়েছে। পূর্ব-পাকিস্তানের উপর চলেছে পশ্চিম-পাকিস্তানের অবদমন, শাসন ও শোষণ। সেজন্যই দেশভাগ ও পাকিস্তান প্রতিষ্ঠার (১৯৪৭) পর থেকেই ভিন্ন সংস্কৃতির দুই জাতির মধ্যে লড়াই লক্ষ করার মতো। এক্ষেত্রে বিশেষ উল্লেখযোগ্য পূর্ব-পাকিস্তানের বাংলা ভাষাভাষী জনগণের উপর জোর-পূর্বক পশ্চিম-পাকিস্তানের শাসকগোষ্ঠী উর্দু ভাষা চাপিয়ে দিতে চাইলে সংঘটিত হয় রক্তক্ষয়ী ভাষা-আন্দোলন (১৯৫২)। এই অবদমন, শোষণ ও শাসন চূড়ান্ত পর্যায়ে পৌঁছালে প্রয়োজন পড়ে পুনরায় দেশভাগের। এই ভাগের জন্য পূর্ব-পাকিস্তানের জনগণ যে সশস্ত্র লড়াই করে তা ইতিহাসের পাতায় 'মুক্তিযুদ্ধ' (১৯৭১) নামে পরিচিত। যে যুদ্ধে ভারত সরকার সক্রিয় ভূমিকা গ্রহণ করে। ধর্মের দিক থেকে এক হয়েও সাংস্কৃতিক ও রাজনৈতিক সাম্রাজ্যবাদ এবং অর্থনৈতিক শোষণের দরুন এই বিভাজন হয়। আসলে ১৯৪৭-এর

দেশভাগের অবশ্যস্বাবী ফলই হচ্ছে ১৯৭১-এর পাকিস্তান-ভাগ এবং নতুন রাষ্ট্র বাংলাদেশের প্রতিষ্ঠা।

বাংলাদেশের ‘মুক্তিযুদ্ধ’-র প্রভাব বাংলা শিল্প-সাহিত্য-অভিনয়কলায় খুব প্রত্যক্ষভাবেই পড়েছিল। ওপার বাংলায় এ-বিষয় নিয়ে নাটক রচনা তো হয়েছেই, এপার বাংলার থিয়েটারেও কিছু নাটক পরিচালিত হয়েছে এবং সেসব নাটক লিখেছিলেন এপার বাংলার নাটককাররা। এর পিছনে অবশ্য সবথেকে বেশি কাজ করেছিল বাঙালি ‘সেন্টিমেন্ট’। ওপার বাংলায় বাংলা ভাষাভাষী যেসব জনগণ বাস করত, ঘটনাস্রোতে তারা অন্যদেশের বাসিন্দা হলেও তাদের সঙ্গে এপার বাংলার যোগাযোগ ছিল আত্মিক। যে আত্মার মূল ছিল একই ভাষা ও একই সংস্কৃতির মাটিতে রোপিত। ফলে তাদের উপর যখন আঘাত আসে এবং রাষ্ট্রীয় স্বৈরাচার যখন পুনরায় ঘর ছাড়তে বাধ্য করে, রাতারাতি তারা উদ্বাস্তু হয়ে পড়ে তখন খুব স্বাভাবিক ভাবেই এপার বাংলার শিল্পী বুদ্ধিজীবী সাহিত্যিক নাট্যকর্মীরা চুপ করে বসে থাকতে পারেননি। তাঁরা পথে নেমেছেন, সভা করেছেন, উপন্যাস, গল্প, কবিতা লিখেছেন, গান বেঁধেছেন, যাত্রা সভায় বাংলাদেশীদের সংগ্রাম প্রচার করেছেন, থিয়েটার মঞ্চে মুক্তিযুদ্ধ অবলম্বনে নাটক প্রদর্শনও করেছেন।

মুক্তিযুদ্ধের অনুষ্ণ নিয়ে বাংলাদেশের কিছু খ্যাতনামা নাটককার ও তাঁদের নাটক হল—মমতাজ উদ্দিন আহমদের ‘স্বাধীনতা আমার স্বাধীনতা’, ‘বকুলপুরের স্বাধীনতা’, ‘এবারের সংগ্রাম, স্বাধীনতার সংগ্রাম’, ‘কি চাহ শঙ্খচিল’, ‘বর্গচোর’, নীলিমা ইব্রাহিমের ‘যে অরণ্যে আলো নেই’, সৈয়দ শামসুল হকের ‘পায়ের আওয়াজ পাওয়া যায়’, জিয়া হায়দারের ‘সাদা গোলাপে আগুন’, আলাউদ্দিন আল আজাদের ‘নিঃশব্দ যাত্রা’, ‘নরকে লাল গোলাপ’ ইত্যাদি। তবে বর্তমান অধ্যায়ে আমাদের আলোচনার ক্ষেত্র পশ্চিমবঙ্গে রচিত যেসব নাটকে মুক্তিযুদ্ধের প্রসঙ্গ আছে সেগুলির মধ্যেই সীমাবদ্ধ থেকেছে। এখানে আলোচনা করা হয়েছে উৎপল দত্তের ‘ঠিকানা’ ও ‘জয় বাংলা’, দিগিন্দ্রচন্দ্র বন্দ্যোপাধ্যায়ের ‘দুরন্ত পদ্মা’, অনিল দের ‘দুর্বার বাংলা’, স্বপন কুমার মিত্রের ‘মুক্তির রাইফেল’, পানু পালের ‘বাঁচার শপথ’।

ঠিকানা :

বাংলাদেশের মুক্তিযুদ্ধের পটভূমিকায় উৎপল দত্ত রচনা করেন দুটি নাটক—‘ঠিকানা’ ও ‘জয় বাংলা’। ‘ঠিকানা’ নাটকটি ২ আগস্ট ১৯৭১ সালে একাদেমি অফ ফাইন আর্টসের মঞ্চে পিপলস্ লিটল থিয়েটার কর্তৃক প্রথম অভিনীত হয়। বিজ্ঞাপনে বলা হয়েছিল এ নাটক ‘বাংলাদেশের সাধারণ মানুষের মুক্তিসংগ্রামের কাহিনী।’^১

উৎপল দত্ত নাটকটি রচনা ও পরিচালনা করছেন বাংলাদেশের মুক্তিসংগ্রামের গোড়ার দিকে। বাংলাদেশের অধিবাসীদের যুদ্ধে সফলতা পেতে এবং স্বাধীনতা অর্জন করতে তখনও অনিশ্চয়তা রয়েছে। মুক্তিবাহিনীর সংগ্রাম এবং ভারতে আশ্রয় নেওয়া বিপুল বাংলাদেশীর ভবিষ্যৎ পরিণতি কী—তা নাটককার জানেন না। এই নাটকের মাধ্যমে তিনি বাংলাদেশের জনগণের সংগ্রামকে কুর্নিশ ও সমর্থন করেছেন এবং পাকিস্তান সরকারের প্রতি আক্রমণ শানিয়েছেন। বাংলাদেশের জনগণের উপর পাকিস্তানের সেনাবাহিনী যে নির্মম বিচারহীন অত্যাচার চালিয়েছিল এই নাটকে তার কথা সংলাপায়িত হয়েছে। তার সঙ্গেই ধরা পড়েছে বাংলাদেশের মানুষের টিকে থাকার এবং নিজেদের মাতৃভূমিকে স্বাধীন করার অদম্য ইচ্ছাশক্তি। নাটকটিতে যাবতীয় ঘটনার স্থান নির্ধারিত হয়েছে মানিকগঞ্জ এবং বিধৃত হয়েছে ১৯৭১-এর ২২ এপ্রিল থেকে ২৫ এপ্রিল পর্যন্ত মোট চারদিনের সময়কাল। প্রধান চরিত্রে মধ্যে রয়েছে— রশিদা খাতুন ওরফে নানী, হাসিবুন, ডাক্তার আনিসুজ্জামান, সাহাবুদ্দিন চৌধুরী, যামিনী সেন, হাসমত আলি, কর্নেল ওয়ালিউল্লা, মেজর জামশেদ আলি, ক্যাপ্টেন গোলাম মহম্মদ, ল্যাফটেন্যান্ট আফজল বোখারি, হাবলদার শের খাঁ প্রমুখ।

নাটকটি শুরু হয়েছে একজন ঘোষকের ঘোষণা দিয়ে। যার ভাঙা ভাঙা বাংলা উচ্চারণ বুঝিয়ে দেয় তিনি অবাঙালি ও পশ্চিম-পাকিস্তানী। ঘোষকের প্রথম উচ্চারণ ‘হাপনারা ডরবেন নাই। ডরবার কোনোয় কারণ নাই।’ পূর্ব-পাকিস্তানে মিলিটারি শাসন জারি আছে এবং ‘যো বদমাশরা য়হাঁ জয় বাংলা আওয়াজ উঠায়ে লড়াই কোরছিল উওলোগ সব খতম হো গয়ে।...শেখ মুজিবরের বদমাশরা ভাগ্ গেছে, পালায়ে গেছে। তাহারা সোব মরে গেছে।’^২ নাটকের শুরুতেই এরকম সংলাপ শোনার পরেই পরিষ্কার হয়ে যায় নাটকের পটভূমি। আলাদা করে বলার কোনও প্রয়োজন পড়ে না যে নাটকের

বিষয় ‘মুক্তিযুদ্ধ’। ‘জয় বাংলা’, ‘শেখ মুজিবুর’ ইত্যাদি শব্দবন্ধ নাটকের দিক নির্দেশ করে দেয়। আর ঘোষকের পরিস্থিতি বর্ণনার মধ্যে ধরা পড়ে মুক্তিযুদ্ধ শুরু হয়েছে এবং তা কিছুদিন ধরে চলছে। পারিপার্শ্বিক অবস্থাও আতঙ্কগ্রস্ত।

এছাড়াও প্রথম দৃশ্যে নানী ও মকবুলের কথোপকথনে লক্ষ্য করি বাংলাদেশের সর্বত্র পাকিস্তানি সেনার তাণ্ডব, সেখান থেকে বাঁচতে অনেকে দেশছাড়া, মুজিবুর রহমান গ্রেপ্তার হয়েছে এবং ঢাকা ছাড়িয়ে বাংলাদেশের সর্বত্র যুদ্ধ ছড়িয়েছে। এরকম পরিস্থিতিতে রশিদা নানীর দোকানকে পোস্টাপিসের মতো ব্যবহার করে মুক্তিযোদ্ধারা। সেখানে সতর্ক পদক্ষেপে মকবুল এসে রশিদা নানীকে সূচনা দেন, নির্দিষ্ট এক ব্যক্তি নানীর দোকানে এসে তাকে একটি গোপন ঠিকানা বলে যাবে, যেটি তাকে মনে রাখতে হবে। সেই ঠিকানায় পাওয়া যাবে ডিনামাইট। পরে অন্য ব্যক্তি এসে সেই ঠিকানা গোপনেই জেনে যাবে। কারণ হিসেবে মকবুল জানায়, পাকিস্তানি সেনার জন্য রেলগাড়ি করে বারুদ আনা হয়েছে যা মুক্তিযোদ্ধাদের উপর প্রয়োগ করা হবে। সুতরাং সময় থাকতেই তার ধ্বংস প্রয়োজন। আর সেজন্যই প্রয়োজন ডিনামাইট। প্রথম দৃশ্যেই যেমন এই কথা ব্যক্ত হয়ে যায়, তেমনি নাটকে আর একটি ঘটনা উপস্থিত হয়—যা সমগ্র নাটকে এক ব্যর্থ কাপুরুষ প্রেমিকের আত্মহত্যাকে ঘিরে আবর্তিত। যে আত্মহত্যাকে খুন বলে প্রচার করে পাকিস্তানি সেনাবাহিনী ছ’জন নির্দোষ বাংলাদেশ নিবাসী অর্থাৎ সাহাবুদ্দিন চৌধুরী, ডাক্তার আনিসুজ্জামান, যামিনী সেন, হাশমৎ আলি, রশিদা খাতুন ওরফে নানী ও হাসিবুনকে গ্রেপ্তার করে এবং পরবর্তীতে মৃত্যুদণ্ডের আদেশ শোনায়। আসলে এই আনুষঙ্গিক ঘটনাটি নাটকের গতি সঞ্চালনের জন্য নাটককার উপস্থাপিত করেছেন বলে মনে হয়। যাতে তিনি দেখাতে সক্ষম হয়েছেন পূর্ব-পাকিস্তানের বাঙালিদের প্রতি পশ্চিম-পাকিস্তানি পাঞ্জাবি মুসলিমদের মনোভাব।

নানীর দোকান ‘সাসুভেলি রেস্টুরেন্ট’-এ সাহাবুদ্দিন চৌধুরী, ডাক্তার আনিসুজ্জামান, যামিনী সেন ও হাশমৎ আলির মধ্যে যে কথোপকথন চলে তাতে উঠে আসে যুদ্ধময় পূর্ব-পাকিস্তানের পরিস্থিতির কথা। এই রেস্টুরেন্টে এসেই বালুচি সন্তান পাকিস্তানের সৈনিক আফজল বোখারী নিখোঁজ হয়। সেজন্য অযথা নানী ও হাসিবুন সহ এই চারজনকে গ্রেপ্তার করে পাকিস্তান সেনা। এখানে সাহাবুদ্দিন চৌধুরী একটি পুঁজিপতি ব্যক্তি। টাকার দম্ব তার সংলাপে প্রায়শই ধরা পড়ে। বাংলাদেশের বিভিন্ন প্রান্তে পাকিস্তানি

সেনার অত্যাচার এবং বিভিন্ন কলেজ ও বিশ্ববিদ্যালয়ে তাদের আক্রমণ, যেমন ঢাকা বিশ্ববিদ্যালয়ে ২৫ মার্চ মধ্যরাতে গুলি করে ছাত্রদের হত্যা করে, ছাত্রীদের ধর্ষণ করে, বিশ্ববিদ্যালয়ে প্রাঙ্গণে ট্যাঙ্ক চালায় সেই কথা নাটকে সাহাবুদ্দিনের সংলাপে উঠে আসে—

‘দেখলাম খানসাহেবরা ছাত্রদের ওপর ট্যাঙ্ক চালাচ্ছে। কলেজটাকে তো কামান দেগে শুইয়ে দিয়েছে—বীভৎস।...কলেজের কম্পাউন্ডে অন্তত তিরিশটা লাশ গুনেছি—তার মধ্যে মেয়ের লাশ অন্তত দশটা...’।^৭

দ্বিতীয় দৃশ্যে আফজল বোখারির লাশ পাওয়া যায় এবং তার পকেট থেকে পাওয়া অর্ধরক্ষিত একটি চিঠি থেকে জানা যায় সে আত্মহত্যা করেছে। বাংলাদেশের বাঙালিদের উপর পাকিস্তান বাহিনীর নির্মম অত্যাচারকে ঘৃণা করত বালুচি সন্তান বোখারি। চিঠিতে তাই লিখেছিল—

‘আমার মৃত্যুর জন্য কেউ দায়ী নয়—একথা লিখতে পারলাম না। আমার মৃত্যুর জন্য দায়ী তারা যারা বাংলাদেশের মানুষের ওপর চাপিয়ে দিয়েছে এই হত্যালীলা। বাঙালির অভিশাপ থেকে আমাদের দেশ বালুচিস্থান মুক্ত হোক।’^৮

চিঠিটা ছিল আসলে প্রেমপত্র, যা শাহেদা ওসমান নামে কোনো এক বাঙালি নারীর উদ্দেশ্যে লেখা। কিন্তু বোখারির এই আত্মহত্যাকে পাকিস্তানি বাহিনী খুন বলে প্রচার করতে চায় এবং তার জন্য গ্রেপ্তার হওয়া ছ’জনের মৃত্যুদণ্ড ঘোষণা করে। কারণ তারা চায় না বাংলাদেশের সাধারণ মানুষ বা মুক্তিযোদ্ধারা জানতে পারুক যে এই যুদ্ধ নিয়ে পাকিস্তানি সেনাবাহিনীর মধ্যেই অন্তর্দ্বন্দ্ব রয়েছে এবং কোনো কোনো সেনার বাংলাদেশি নিবাসীদের প্রতি আছে সহানুভূতি। যা বিরোধী পক্ষের মনোবল বৃদ্ধি করতে সাহায্য করতে পারে। সে জন্য মিথ্যা খুনের মামলায় গ্রেপ্তার হওয়া ছয় জন বাঙালির প্রতি মৃত্যুদণ্ডের আদেশ হয়।

মুক্তিযুদ্ধের সময় পাকিস্তান সেনাবাহিনী নির্দোষ বাঙালিদের বিনা কারণে কেবল বাঙালি বলে হত্যা করেছে। সুতরাং ছয় বন্দিদেরও বুঝতে অসুবিধা হয় না তাদের পরিণতি কী হতে পারে। অথচ হাসমৎ, সাহাবুদ্দিন, যামিনী ও আনিসুজ্জামান পাকিস্তানের তেমন কোনো বিরোধী ছিল না, আওয়ামি লীগের কোনো সদস্যও তারা নন। মৃত্যু

অবশ্যম্ভাবী এই আশঙ্কা তাদের মধ্যে ছিলই, পরে নিশ্চিত হয়ে যায় পাক-বাহিনীর কর্নেল ওয়ালিউল্লাহ দপ্তর থেকে আনিসুজ্জামানের আনিত সংবাদে। আনিসুজ্জামান কর্নেল ওয়ালিউল্লাহ সঙ্গে দেখা করার সুপারিশ করেছিল; অনুমতি পেলে দেখা করতে গিয়ে জানতে পারে ২৫ এপ্রিল রবিবার ভোর ছ’টায় ছয় বন্দিকে সামরিক আইনে মৃত্যুদণ্ডে দণ্ডিত করা হবে। একজন মদ্যপ মৃত পাক-সেনার মৃত্যুর জন্য ছয় জনকে মারাটা কী ‘ইনসাফ’—আনিসুজ্জামান জানতে চাইলে ওয়ালিউল্লাহ বলতে দ্বিধা করে না, ‘মৃত লেফটেন্যান্ট একজন পশ্চিম পাকিস্তানী; আপনারা বাঙালি মাত্র।’^৫

আফজল বোখারি যে আত্মহত্যা করেছে সেটা পাকিস্তানবাহিনী ছাড়া আর জানত শাহেদা ওসমান। সুতরাং তাকে গ্রেপ্তার করতে না পারলে মুক্তিবাহিনীরও জানতে বাকি থাকবে না। সেজন্য শাহেদা ওসমানকে গ্রেপ্তার করার জন্য তৎপর হয়ে ওঠে পাকসেনা। এই অবস্থায় মুক্তিযোদ্ধা মকবুল শাহেদাকে খুঁজে বার করে নিয়ে যায় গা ঢাকা দেওয়ার জন্য মাদার-ই-মিল্লাত হাইস্কুল ফর গার্লস-এ। স্কুলে পাকবাহিনীর বর্বরতার চিহ্ন পরিদৃশ্যমান। স্কুলকে তারা ভেঙেছে, পুড়িয়েছে বাংলা বইপত্র। তার মধ্যে রবীন্দ্রনাথ ঠাকুরেরও বই ছিল। বাঙালি সংস্কৃতির উপর শানিয়েছে আক্রমণ। বোখারির আত্মহত্যার কথা মকবুল জানতে পারে শাহেদার কাছ থেকে। সেটা দেশময় প্রচার করার সিদ্ধান্ত নেয় মকবুল। যাতে পাকিস্তান সেনার নৃশংসতার কথা শুনে বাংলাদেশ নিবাসীদের মনে তৈরি হয় পাকিস্তানের প্রতি ক্ষোভ ও ঘৃণা। যারা যুদ্ধ থেকে নিজেদের সরিয়ে রেখেছিল তাদের মনেও যেন জন্ম নেয় যুদ্ধের তাগিদ। শাহেদার সঙ্গে বোখারির পূর্ব পরিচয়ের কথা বলতে গিয়ে শাহেদা বলে ২৮ মার্চের কথা। যেদিন পাকবাহিনী আক্রমণ করেছিল কলেজ প্রাঙ্গণে ছাত্রছাত্রীদের উপর। হত্যা করেছে পঞ্চাশ জন ছাত্রকে, ধর্ষণ করেছে ছাত্রীদের। তাদের মধ্যে ছিল শাহেদার প্রেমিক কায়ফি; যে কবিতা আওড়ে যুদ্ধ থামাতে চেয়েছিল, কিন্তু পারেনি। শান্তির কোনো বাণীই তারা শোনেনি। সশস্ত্র যুদ্ধই একমাত্র পথ।

নাটকে গ্রেপ্তার হওয়া ছয় চরিত্র সমাজের বিভিন্ন শ্রেণির অন্তর্গত। আনিসুজ্জামান পেশায় ডাক্তার, যামিনী নাট্যকার, হাসমৎ যামিনীর বন্ধু ও মধ্যবিত্ত সাধারণ ব্যক্তি। এরা তিনজনেই পাতি বুর্জোয়া শ্রেণির অন্তর্গত। সাহাবুদ্দিন চৌধুরী সমাজের পুঁজিপতি ব্যবসায়ী। দিনমজুর নানী একসময় তার কারখানারই শ্রমিক ছিল এবং হাসিবুনের মা

রাবেয়া সাহাবুদ্দিনের কারখানাতে এক দুর্ঘটনায় মারা যায়। কারণ সাহাবুদ্দিন যন্ত্রের মেরামত করেনি। তাই নানী সাহাবুদ্দিনকে ধিক্কার দিয়েছে এই বলে—

‘ঐ রাবেয়ার ঘাড়ে ধ্বসে পড়ে ফ্রেন। কারণ আপনি যন্ত্র সারাননি। আপনার কাছে রাবেয়ার প্রণের দাম ছিল মেশিন সারাবার চেয়েও কম।’^৬

নাটকে প্রত্যেকটি চরিত্রের মনস্তত্ত্ব বিশ্লেষণ করেছেন নাটককার। বিশেষ করে যামিনী, সাহাবুদ্দিন ও নানীর। প্রত্যেকের মানসিক দৃঢ়তা এবং মনের উদারতা ও সংকীর্ণতা তাদের শ্রেণির সঙ্গে যুক্ত। যেমন যামিনী যখন জানতে পারে তার স্ত্রী সেলিমা যে সন্তানের জন্ম দিতে গিয়ে মারা যায় সেই সন্তানটি আসলে ছিল তার বন্ধু হাশমতের। তখন তার কাছে পৃথিবীর সব কিছুই প্রতারণা বলে মনে হয়েছে। মনে হয়েছে সে জীবনে ব্যর্থ একজন ব্যক্তি। কিন্তু তার মধ্যে নায়কোচিত (Heroic) ব্যাপার কাজ করত; আর সেটা তার মধ্যে সঞ্চারিত হয়েছে নাটকে বিভিন্ন নায়কের ভূমিকায় অভিনয় করতে করতে। সেজন্যই সে যখন দেখেছে মৃত্যু অবশ্যস্বাবী তখন পাক-অফিসার ওয়ালিউল্লাহর কাছে গিয়ে বোখারির মৃত্যুর দায় নিজের ঘাড়ে নিয়ে নিজের প্রাণের বিনিময়ে বাকি পাঁচ জনের প্রাণ বাঁচাতে চেয়েছে। যাতে সে নায়কের সার্থকতা পেয়ে নিজের জীবনের গ্লানি মুছতে পারে।

সাহাবুদ্দিন পুঁজিপতি ব্যবসায়ী। টাকা ও প্রতিষ্ঠার অহঙ্কার তার সর্বত্র। আনিসুজ্জামানের গবেষণা ‘Notes on Death and Disintegration of Psychic Standards’-এ তার চরিত্র ব্যাখ্যা হয়েছে এভাবে—‘Extrovert, sublimating his fears...মৃত্যুর সম্ভাবনা পর্যন্ত অস্বীকার করেছে...মৃত্যুর কাছাকাছি এসে তার নৈতিক, মানসিক ও সামাজিক মান সম্পূর্ণ ধ্বসে গেছে।’^৭ উৎপল দত্তের ‘বিপ্লবী থিয়েটার’-এ পুঁজিপতি শ্রেণির কলুষিত দিক বারবার উঠে এসেছে—যা শ্রেণিঘৃণা উদ্বেক করতে বিশেষ সহায়তা করে, দর্শকের চিনে নিতে সুবিধা হয় তাদের শত্রুকে। এ নাটকেও তার অন্যথা দেখি না। সাহাবুদ্দিন চৌধুরীদের কাছে দেশ, জনগণ, সমাজ, পাপ-পুণ্য এসবের কিছু মূল্য নেই। তারা একমাত্র নিজেদের জন্যই বাঁচে আর নিজেদের মুনাফা বৃদ্ধির চেষ্টা করে। তাই সে বলে—

‘হ্যাঁ, সেটা ছিল ’৪৭ সালের জুন। মাউন্টব্যাটেন দিল্লীতে এসে গেছেন। লীগ আর কংগ্রেস নেতারা চুপি চুপি সব ব্যবস্থা ক’রে ফেলেছেন। কিন্তু

এই বাংলা দেশের মুসলমানদের কিছুতেই বাগ মানানো যাচ্ছিল না। কিছুতেই তারা বাংলাদেশকে ভাগ করতে দেবে না।...আমি তো রাজনীতি করতাম না। পিছন থেকে টাকা যোগাতাম। তাই রূপচাঁদের জোরে...মুসলিম লীগের অধিবেশনে ঢুকে গেলাম। বললাম—

বৃটিশ সরকার তো কোনো সমস্যা নয়। সমস্যা হচ্ছে সুভাষ বোস আর বোম্বাইয়ের কমিউনিস্টরা।...বাংলাদেশ দু'-টুকরো হবে। এটা মেনে নিলে আপনারা হারাচ্ছেন কি? বাংলাদেশের ঐক্য ও সংহতি। সেটা তো চোখে দেখা যায় না। কিন্তু চট করে গদিতে বসে পড়তে না পারলে কমিউনিস্টরা জিতবে।...আমি হারাবো আমার পাট...আপনি হারাবেন জমিদারি...ইনি হারাবেন কারখানা।’^৮

সে নিজের প্রাণ বাঁচাতে কর্নেল ওয়ালিউল্লাকে অর্থের লোভ দেখিয়েছে। এমনকি যেখানে যামিনী বোখারির মৃত্যুর দায় নিজের ঘাড়ে নিয়ে বাকি পাঁচজনকে বাঁচাতে চেয়েছে, সেখানে সাহাবুদ্দিন নানীর ঘাড়ে সেই দোষ চাপিয়ে নিজে বাঁচতে চেয়েছে। তার জন্য শেষ পর্যন্ত সকলের কাছে সে ঘৃণার পাত্র হয়েছে।

রশিদা খাতুন ওরফে নানীকে নাটকের প্রধান চরিত্র বলা যেতে পারে। তার বুদ্ধিমত্তা ও চারিত্রিক দৃঢ়তার উপর মুক্তিযোদ্ধাদের অগাধ ভরসা। সেজন্যই তারা তাকে ও তার দোকানকে নিজেদের কাজের কেন্দ্র বানিয়েছে। কোন ঠিকানায় ডিনামাইট পাওয়া যাবে তা কেবল জানত নানী; কিন্তু সে কারাবন্দি। তারপরেও তার উপর মুক্তিযোদ্ধা মকবুলের ভরসা আছে। তাই সে বলে—

‘...নানী জানে ও ঠিকানায় ডিনামাইট পাওয়া যাবে। গাড়ি ওড়াতে হবে। সুতরাং সে পাঠাবেই। বলা যায় না হয়তো কোন খাঁ সাহেবের হাতেই পাঠিয়ে দেবে।’^৯

নাটকেও দেখি সে তার বুদ্ধিমত্তার পরিচয়। বোখারির দেওয়া একটি চিঠি তার দোকানে থেকে গেছে—এই অজুহাত দিয়ে জেলের বাইরে বেড়িয়ে মুক্তিযোদ্ধাদের সেই ঠিকানা সে জানিয়ে দিয়ে গেছে। তার চারিত্রিক দৃঢ়তার পরিচয় মেলে সপ্তম দৃশ্যে। যেখানে ওয়ালিউল্লা তার অভিসন্ধির কথা জানতে পেরে তার উপর অকথ্য অত্যাচার করেছে।

জানতে চেয়েছে তার জেলের বাইরে যাওয়ার কী উদ্দেশ্য ছিল? তার গায়ে নাইট্রিক অ্যাসিড ঢেলে, জ্বলন্ত চুরটের ছাঁকা দিয়ে জানতে চেয়েছে বাংলাদেশের কমিউনিস্ট পার্টির নেতা এবং আওয়ামীলিগের লোকজনের পরিচয়; কিন্তু সে বলেনি। আনিসুজ্জামানের কথায়, ‘বীর বলতে যা বোঝায়, হিরো বলতে ইতিহাসে যা বুঝিয়েছে, রশিদা খাতুন বোধহয় তাই। তাঁর নীরব বীরত্বের কাছে মৃত্যু পরাজিত।’^{১০} নানীর চরিত্রের আর একটি দিক তার গল্প বলার অভ্যাস। নাটকের প্রথম দিকে সব অবাস্তুর কথা বলেও নাটকের শেষের দিকের গল্পগুলি পুঁজিবাদী, ফ্যাসিবাদী ও সাম্রাজ্যবাদী শক্তির মুখোশ খুলতে সাহায্য করে। তার কাজলবিবির গল্পতে ধরা পড়ে বাংলাদেশের সংগ্রামের ইতিহাস—

‘আমার সহী কাজলবিবির ছিল তিনটি ছেলে—রহমৎ, বরকৎ, শহাদৎ। তিনটির মধ্যে দুটো মরে গেল ভাষা আন্দোলনে। তখন কাজল বলল, ভাগ্যিস তিন ছেলের মা হয়েছিলাম, তাই একটা থেকে গেল। কিন্তু এই তৃতীয়টি শহাদৎ—সে গেল।’^{১১}

নাটকের শেষ হয়েছে বন্দি পাঁচ জনের মৃত্যু দিয়ে। হাসিবুনের বয়েস অল্প বলে তাকে শেষ পর্যন্ত মৃত্যুদণ্ড দেওয়া হয়নি। মৃত্যুকালে আনিসুজ্জামান কেবল নিজের ব্যক্তিগত প্রতিষ্ঠা ছাড়া আর কিছুই মনে করেনি। বাকি চার জন বাংলাদেশের জয়ধ্বনি ও ভবিষ্যতের স্বাধীনতার স্বপ্ন নিয়ে মৃত্যুবরণ করেছে। আর নাটকের শেষ হয়েছে ডিনামাইটের বিস্ফোরণে বারুদের গাড়ির বিধ্বস্ত হওয়ার আওয়াজে।

জয় বাংলা :

মুক্তিযুদ্ধের পটভূমিতে উৎপল দত্তের ‘জয় বাংলা’ নাটকটি রবীন্দ্র সদন মঞ্চে ১৪ সেপ্টেম্বর ১৯৭১ সালে প্রথম অভিনীত হয়। আটটি দৃশ্যে বিভক্ত নাটকটির প্রথম দৃশ্যই নাটকের যাবতীয় সংকট ও পটভূমির আভাস পাওয়া যায়। মৌলবী মোজাম্মেল হকের কন্যা নাজের সঙ্গে বেঙ্গল রেজিমেন্টের সৈনিক লেফটেনেন্ট ওয়াহেদ আলির বিয়ের আশীর্বাদ অনুষ্ঠান দিয়ে নাটকের সূচনা। সেই আশীর্বাদ অনুষ্ঠানে আখলাকুর রহমান ওরফে বড়মিয়া এসে জানাচ্ছে যে, তারা নিজেদের প্রাণ বাঁচাতে সপরিবারে মোহাম্মদপুর ছেড়ে চলে যাচ্ছে

খেয়ালির চরে গা-ঢাকা দিতে। কারণ পশ্চিম-পাকিস্তানের সেনা পূর্ব-পাকিস্তানের জনগণের উপর নৃশংস অত্যাচার চালাচ্ছে এবং সেই সঙ্গে পূর্ব-পাকিস্তানের বাঙালি অধিবাসীরা নিজেদের স্বাধীন করতে ‘মুক্তিযুদ্ধ’ ঘোষণা করেছে। এই বড়মিয়া ভীত ব্যক্তি নন, সে একজন গেরিলা যোদ্ধা। কিন্তু সে মুক্তিযুদ্ধে অংশ নেবে না; কারণ শত্রুর হাত থেকে নিজের দেশ রক্ষা করলেও তার অবস্থার কোনও উন্নতি হওয়ার আশা সে দেখে না। কারণ দবিরুল হোসেনের মতো মহাজনরা চিরকাল তাদের শোষণ করে, ঋণের জালে আবদ্ধ করে। তারা খেয়ালির চরের উদ্দেশ্যে রওনা হলে দবিরুলও নিজেকে পাকিস্তানি সেনার হাত থেকে বাঁচাতে বড়মিয়ারই শরণাপন্ন হয়। ঘটনাক্রমে পাকিস্তানি সেনার ব্রিগেডিয়ার ইফতিকার খাঁ মৌলভি মোজাম্মেল হকের বাড়িতে প্রবেশ করে বড়মিয়ার বর্তমান ঠিকানা জানার জন্য। তারা না বলতে চাইলে তাদের হুমকি দেয়, এমনকি মেয়ে নাজের উপর শারীরিক অত্যাচার করতেও পিছপা হয় না। অবশেষে নিজের মেয়েকে বাঁচাতে ঠিকানা বললেও পাকিস্তানি সেনা মৌলভীকে হত্যা এবং নাজকে নির্মমভাবে ধর্ষণ ও বন্দি করে। এদিকে ওয়াহেদ আলি পাকিস্তানি সেনার চাকরি ছেড়ে মুক্তিযুদ্ধে নিজেকে সমর্পণ করেছে এবং পূর্বতন গেরিলা সেনানায়ক বড়মিয়ার খোঁজে খেয়ালির চরে এসে উপস্থিত হয়েছে, যাতে পুনরায় বড়মিয়াকে বন্দুক ধরতে রাজি করাতে পারে। অন্যদিকে পাকিস্তানি সেনাও বড়মিয়ার খোঁজে খেয়ালির চরের দিকে রওনা হয়। এক্ষেত্রে তাদের হামিদ শেখ বলে একজন নৌকার মাধ্যমে নদী পার করতে সাহায্য করে। পরবর্তীতে দেখা যায় বড়মিয়াই আসলে এই হামিদ শেখের ছদ্মবেশ ধারণ করেছিল। তারই সাজানো প্ররোচনায় পাকিস্তানি সেনা সেদিন পরাজিত হয়। আলি ইয়ার খাঁ বন্দি হয়। পরিশেষে তাকে হত্যা করে নিজের উপর অত্যাচারের প্রতিশোধ নেয় নাজ। কিন্তু অবশেষে দবিরুল হোসেনের বিশ্বাসঘাতকতার সুযোগ নিয়ে পাকিস্তান সেনাবাহিনী বড়মিয়ার সন্ধান পেয়ে যায়। বড়মিয়াকে হত্যা করতেও তারা সক্ষম হয়। তবুও ওয়াহেদ আলি ও নাজকে তারা সেখানে পায়না। কারণ ভবিষ্যত লড়াইয়ের সম্ভাবনা বজায় রাখতে তারা নিজেদেরকে বাঁচিয়ে রাখার প্রয়োজনীয়তা অনুভব করে আগেই সেখান থেকে অন্তর্হিত হয়ে যায়।

উৎপল দত্ত নাটকটিতে বাংলাদেশের দুটি সংকটকে তুলে ধরেছেন—একটি পাকিস্তান সেনা দ্বারা সাধারণ মানুষের উপর অত্যাচার, নারীদের সম্মানহানি, গণহত্যা, রাহাজানি ইত্যাদি; আর অন্যদিকে দবিরুল হোসেনের মতো মহাজনদের অত্যাচারে

বড়মিয়ার মতো সাধারণ মানুষের অসহায় অবস্থা। সেজন্যই নাটকে আমরা বাংলাদেশের জনগণকে এই দুপক্ষের সঙ্গেই প্রাণপণ লড়াই করতে দেখি। নাটকের প্রথম দৃশ্যেই এই দুটি সংকটের কথা উঠে আসে। পাকিস্তান গঠনের পর থেকে পশ্চিম-পাকিস্তান পূর্ব-পাকিস্তান তথা বাংলাদেশকে নিজেদের উপনিবেশ ভেবেছে। সেখানে তারা উন্নয়নের বদলে শোষণ চালিয়ে নিজেদের পশ্চিম-পাকিস্তানকে উন্নত করেছে। বাংলাদেশ বা পূর্ব-পাকিস্তান ছিল তাদের কাছে খোলা বাজার এবং কাঁচামাল সংগ্রহের উপায় মাত্র। পশ্চিম-পাকিস্তান অর্থনৈতিক-রাজনৈতিক-সামাজিক সমস্ত দিক থেকে পূর্ব-পাকিস্তানকে অবদমিত করেছে। এছাড়াও আছে বাংলাদেশের জোতদার-মহাজনরা। যাদের অত্যাচারে সাধারণ মানুষ নাজেহাল। এই সত্যই ব্যক্ত হয়েছে নাটকের প্রথম দৃশ্যে কবিয়াল খলিফের ‘দুখের কথা বলব কত’ গানে। গানের কিছু কিছু পঙ্ক্তি তুলে ধরলেই উপরোক্ত বক্তব্য পরিস্ফুট হবে।-

‘দিবা নিশি খাটি তবু

তেল আনতে নুন ফুরায় ॥

...

সকল কিনি ডবল দামে

তবু আছি যেন স্বর্গধামে

দালালরা তাই শোনায় ॥

...

ফৌজী হুকুম করে জারি

নিলাম করে ঘর ও বাড়ি

পাঞ্জাবে সব নিয়া জমায় ॥

...

এখন তারা নানান ছলে

আরবী উর্দুর কথা বলে

দোষ নাহি ইংরাজি বোলে

যত জ্বালা এ বাংলায়।^{১২}

খলিফের গানে ধরা পড়ে বাংলাদেশের দ্বিমুখী সংকটের কথা। যার একদিকে পাকিস্তানের পশ্চিমী শক্তি, অন্যদিকে বাংলাদেশেরই মহাজন শ্রেণি। এই মহাজনদের পরিচয় দবিরুল হোসেনের চরিত্রে মেলে। ভাষা আন্দোলনে লড়াই করার জন্য বড়মিয়ার জেল হলে সেই সুযোগে দবিরুল হাতিয়ে নেয় বড়মিয়ার সম্পত্তি। সেজন্যই মুক্তিযুদ্ধের সংকটময় পরিস্থিতিতে বড়মিয়া হাত গুটিয়ে চলে যায়। এর কারণ তার কথাতেই ব্যক্ত হয়—

‘এখন আমার কাছে মুক্তি মানে এইসব মহাজনদের হাত থেকে মুক্তি—আর কিছু আমি ভাববো না। আমি মুক্তিযুদ্ধ করব, আর ইনি পিছন থেকে আমার সর্বস্ব কেড়ে নেবেন এরকম বিলিবিবস্থায় আমার চলছে না।’^{১৩}

নাটকটির পটভূমির সময়কাল বিচার করলে দেখি প্রথম দৃশ্যে মৌলভী বলেছে ঢাকায় ইয়াহিয়ার সঙ্গে মুজিবুরের আলোচনা চলছে। অর্থাৎ পটভূমি সাধারণ নির্বাচন পরবর্তী, যখন ঢাকায় এসে ইয়াহিয়া খান দফায় দফায় মুজিবুরের সঙ্গে আলোচনা করে সেই সময় পর্বকে নির্দেশ করে। উৎপল দত্ত যে সময় নাটকটি রচনা করেছেন সেই সময় বাংলাদেশের মুক্তিযুদ্ধ চলছে, নির্বাচনে মুজিবুরের জয়ী হওয়া সত্ত্বেও তাকে পাকিস্তানের ক্ষমতা দিতে নারাজ ইয়াহিয়া। এমনকি তাকে গ্রেপ্তার পর্যন্ত করেছে। সেইরকমই পশ্চিমবঙ্গেও বারবার রাষ্ট্রপতি শাসন জারি করে সরকার ফেলে দেওয়ার অপথেলা চলছে। নাটককার সেই ঘটনারও প্রতিবাদ জানিয়েছেন এই নাটকে। তাই বড়মিয়ার কণ্ঠে শোনা যায়—

‘ঘরের পাশে পশ্চিমবাংলায় ভোট দিয়ে কোনো সরকারকে দাঁড় করাতে পারছে মানুষ?’^{১৪}

পশ্চিম পাকিস্তানিরা বাঙালিদের খুব ভালো চোখে কোনদিনই দেখত না। ফিরোজ খান নুন ১৯৫২ সালে বলেছিলেন— এরা আধা-মুসলিম।^{১৫} পশ্চিম-পাকিস্তানিরা বাঙালি মুসলিমদের ভীতু এবং অকেজো মনে করত। সেজন্যই পশ্চিম পাকিস্তানি-নেতৃবৃন্দ

নিজেদের ক্ষমতা বজায় রাখার জন্য কেন্দ্রীয় আইন সভায় বাঙালি সদস্য সংখ্যা কমাতে চেয়েছিলেন। প্রশাসনের উচ্চ পদে বাঙালির সংখ্যা ৩০ শতাংশের বেশি কোনো দিনও যায়নি। প্রেসিডেন্ট ইয়াহিয়া খান সচিবের পদে মাত্র তিন জন বাঙালি পেয়েছিলেন। ১৯৭০ সালে পাকিস্তান সেনাবাহিনীতে একজন মাত্র বাঙালি ল্যাফটেন্যান্ট ছিলেন।^{১৬} পাকিস্তান বাহিনীতে বাঙালি কখনও সমমর্যাদা পায়নি। নাটকের দ্বিতীয় দৃশ্যে বক্সিং ম্যাচে নাটককার সে কথা ব্যক্ত করেছেন। পশ্চিম-পাকিস্তানি আলি ইয়ার খাঁ বারবার নিয়ম ভাঙলেও তার কোনও ফাউল হয় না। উপরন্তু সঠিকভাবে ওয়াহেদ আলি ম্যাচ জিতলেও তাকে অযথা নিয়ম ভঙ্গের অভিযোগে পরাজিত ঘোষণা করা হয়—কেবলমাত্র বাঙালি হওয়ার দরুন। তার সঙ্গে আলি ইয়ার খাঁ হাত মেলাতে ঘৃণা বোধ করে। তাকে ‘বাঙালি কুত্তা’, ‘আধা কাফের’, ‘বাঙালি গদ্দার’ বলে অপমান করে। এছাড়াও তৃতীয় দৃশ্যে আলি ইয়ার খাঁ মৌলভী মোজাম্মেলকে সরাসরি বলে ‘আপনি বাঙালি, মুসলমান নন’ বা ‘বাঙালি মুসলিমদের আমরা মুসলিম মনে করিনা’ ইত্যাদি। এই বক্সিং ম্যাচ চলাকালীন ব্রিগেডিয়ার ইফতিকার খাঁ ও লেফটেন্যান্ট করম দাদ-এর কথোপকথনে উঠে আসে—ঢাকায় বুকে পাকিস্তানি সেনা তাণ্ডব করেছে, ইউনিভার্সিটির হোস্টেলে ঢুকে ছাত্র-ছাত্রীদের হত্যা ও ধর্ষণ করেছে এবং মুজিবুর রহমানকে গ্রেপ্তার করার পরিকল্পনা করেছে পাকিস্তানের শাসক। আর একটু পরেই মাইকে ঘোষণা হয়ে যায়—

‘অ্যাটেনশন! অ্যাটেনশন অল অফিসার্স এন্ড মেন! ঢাকা থেকে হাই কমান্ডের অর্ডার—অপারেশন সুলতান! কলেজ হস্টেল আর পুলিশ ব্যারাক সাফ করুন। সব সন্দেহজনক বাঙালিকে শেষ করুন। অপারেশন সুলতান আরম্ভ করুন! পাকিস্তান জিন্দাবাদ!’^{১৭}

নয় মাস ব্যাপী বাংলাদেশের মুক্তিযুদ্ধে পাকিস্তান বাহিনী দ্বারা বিশেষ ক্ষতিগ্রস্ত হয়েছিল নারীদের সম্মান। অন্তত দুই লক্ষ থেকে চার লক্ষ মতো নারী ধর্ষিত হয়েছিল নির্মমভাবে।^{১৮} সুতরাং পাকিস্তান সেনা বাংলাদেশে যে নারী নির্যাতন করেছিল নাটককার সেই দৃশ্য রূপায়ণ করবেন খুব স্বাভাবিকভাবেই। সেজন্যই তৃতীয় দৃশ্য দেখি এক মর্মান্তিক দৃশ্য; যেখানে নাজকে লাঞ্ছিত ও ধর্ষণ করে ক্যাপটেন আলি ইয়ার খাঁর। এই দৃশ্যে আরও দুটি বর্বর ঘটনার কথা আছে। একটি হল ফিরোজার স্বামী ও সন্তানকে বর্বরের মতো হত্যা করেছে পাকিস্তান সেনা। দ্বিতীয়ত মৌলভী মোজাম্মেলের বাড়িতে থাকা রবীন্দ্রনাথ

ঠাকুরের বই পুড়িয়ে ফেলেছে। কারণ তারা মনে করে ‘বাঙালিদের বিদ্রোহে রবীন্দ্রনাথ একটা স্লোগান, একটা যুদ্ধের নিশান।’^{১৯}

নাটকে চতুর্থ দৃশ্যটি বিশেষ গুরুত্বের দাবি রাখে। মুক্তিযুদ্ধের পূর্বে ও সমসময়ে বাংলাদেশের সামাজিক-অর্থনৈতিক অবস্থা ছিল পাকিস্তানি শাসকের প্রেক্ষিতে ঔপনিবেশিক, সাম্রাজ্যবাদী ও সম্প্রসারণবাদী শোষকের প্রেক্ষিতে আধা ঔপনিবেশিক এবং আভ্যন্তরীণ সামন্তবাদের প্রেক্ষিতে আধা সামন্ততান্ত্রিক। এরকম পরিস্থিতিতে বাংলাদেশে মুক্তিযুদ্ধের মাধ্যমে যে বিপ্লবের উত্থান ঘটেছিল তার চরিত্র ছিল দুটি—১. পাকিস্তানি ঔপনিবেশিক শোষণ ও আধা সাম্রাজ্যবাদী শোষণ থেকে মুক্তির প্রক্ষেপে এটি ‘জাতীয় মুক্তি বিপ্লব’ এবং ২. আভ্যন্তরীণ সামন্তবাদী শোষণ থেকে মুক্তির প্রক্ষেপে এটি ‘গণতান্ত্রিক বিপ্লব’।^{২০} মুক্তিযুদ্ধের এই দ্বিতীয় দিকটিকে উৎপল দত্ত তাঁর এই নাটকে খুব স্পষ্টভাবে চিত্রিত করেছেন। প্রথম থেকেই দবিরুলের প্রতি বড়মিয়ার আক্রোশ সোচ্চারে ঘোষিত হয়েছে। নাটকের চতুর্থ দৃশ্যে এই বক্তব্য আরও প্রকাশ্য। বড়মিয়ার সঙ্গে নিয়ে দবিরুল যখন সপরিবারে নিজেদের প্রাণ বাঁচাতে খেয়ালির চরে আত্মগোপন করে তখন সে ট্রাঙ্কে বোঝায় করে তমসুক, জমির দলিল, মামলার কাগজ, ওকালতনামা সঙ্গে নিয়ে গেছিল। তার আশা ছিল পরিস্থিতি আবার সাধারণ হলে নিজের সমস্ত প্রতিপত্তির উপর আবার রাজত্ব করবে। কিন্তু এখানে তার নিজের সন্তান ইকবালই বিরোধিতা করেছে। সে ট্রাঙ্ক বোঝাই কাগজ-পত্র জলে ফেলে দেয়। ইকবাল মুক্ত বাংলার আগামী দিনের সন্তান, তার মনে শোষণমুক্ত বাংলাদেশ গড়ার বাসনা আছে। তাই সে দৃষ্ট কথায় নিজের বাবাকেও বলতে ছাড়ে না—

‘জুলুমবাজি চালিয়েছ তোমরা। এইবার সব জুলুমের পালা শেষ করে দেয়ার লড়াই। পাঞ্জাবি মিলিটারি আর বাঙালি মহাজন—সবাইকে ঠেঙাবো।’^{২১}

নাটককার বাংলাদেশের মুক্তিযুদ্ধে সেখানকার সাধারণ মানুষের সংগ্রামকে বীরগাথায় রূপায়িত করেছেন তাঁর নাটকে। এই যুদ্ধ যে কেবল রাজনৈতিক নেতা, কর্মী, সংগঠন বা বেঙ্গল রেজিমেন্ট ও বাঙালি পুলিশ দিয়ে জয় করা যাবে না তা বুঝতে কারও বাকি থাকে না। সেজন্যই ওয়াহেদ এসেছে গেরিলা যোদ্ধা বড়মিয়ার কাছে—যাতে সে যুদ্ধে যোগ দেয়। বড়মিয়ার সঙ্গে আছে হানিফ ও বদরের মতো সাধারণ কৃষক। বড়মিয়ার

নির্দেশে সাধারণ মানুষ গেরিলা যুদ্ধ শুরু করলে মুক্তিফৌজের চাপ কমবে। এই প্রয়োজন অনুভব করে ওয়াহেদের মতো সৈন্যরা। এই মুক্তিসংগ্রামে বাংলাদেশের আবালবৃদ্ধবনিতা অংশগ্রহণ করেছিল। নাটকেও তার রূপায়ণ দেখি। বড়মিয়ার কিশোর সন্তান আব্বাস মুক্তিযুদ্ধে যাওয়ার জন্য উদগ্রীব। ধর্ষিতা নাজ নিজের শত্রুকে খতম করার কাজে দৃঢ়প্রতিজ্ঞ। এরা অস্ত্র চালানো শিখে যুদ্ধে যোগদান করতে ইচ্ছুক। আবার অন্যদিকে বাংলাদেশের ঘরে ঘরে জ্বলছে বিদ্রোহের আগুন, সমস্ত দিক থেকে তারা পাকিস্তান সেনাদের অসহযোগিতায় নেমেছে। একটাও ঘরে পাকিস্তানি সেনা এক গ্লাস জল পায় না, এমনকি পুকুরেও বিষ ছড়িয়ে দিয়েছে। পাকিস্তান সেনার ব্রিগেডিয়ার ইফতিকার খাঁর মুখে শুনতে পায়—

‘...পুরো বাঙালি জাতি লড়ছে। সব রাস্তাঘাট কেটে উড়িয়েছে, রেললাইন উপড়ে নিয়েছে। যেখানে সেখানে গেরিলার বাচ্চারে হামলা চালিয়ে আমাদের মারছে।’^{২২}

উৎপল দত্ত তাঁর সমস্ত নাটকে ভণ্ড ধর্মগুরু, পুঁজিপতি, জোতদার, জমিদারদের মুখোশ খুলেছেন। এই নাটকও তার ব্যতিক্রম নয়। পাকিস্তানি সেনাদের পাশবিক রূপ তুলে ধরার সঙ্গে সঙ্গে তিনি সমাজের এই সব শোষণশ্রেণিরও স্বার্থপরতা দেখিয়েছেন স্পষ্টভাবে। নাটকের ষষ্ঠ দৃশ্যে আগমন ঘটেছে বাংলাদেশের এক মৌলানা চরিত্র হাকিমুদ্দিন। সেও নিজের প্রাণ বাঁচাতে খেয়ালির চরে এসে উপস্থিত হয়েছে। সে মৌলানা হয়েও বিলাসী জীবনযাপন করে, রাজনৈতিক দিক থেকে মুসলিম লীগের সঙ্গে যুক্ত থেকেছে, তিনবার মুনসিগঞ্জে দাঙ্গা লাগিয়েছে, গুন্ডা দিয়ে হিন্দুদের খুন করিয়েছে। আবার অন্যদিকে দবিরুল হোসেন ব্রিগেডিয়ার ইফতিকার খানের কাছে বড়মিয়ার বর্তমান ঠিকানা জানিয়ে দিয়েছে। সে বিশ্বাসঘাতকতা করেছে বাঙালি জাতির কাছে। কিন্তু তার মাশুলও সে চুকিয়েছে। তার বিশ্বাসঘাতকতায় কেবল বড়মিয়া ও তার সন্তান আব্বাসই মারা যায়নি, সেই সঙ্গে কেড়ে নিয়েছে দবিরুলের সন্তান ইকবালকেও।

দুরন্ত পদ্মা :

বাংলাদেশের মুক্তিযুদ্ধের পটভূমিতে দিগিন্দ্রচন্দ্র বন্দ্যোপাধ্যায় রচনা করেন ‘দুরন্ত পদ্মা’ (১৯৭১)। পাকিস্তান বাহিনী দ্বারা কবলিত ও শৃঙ্খলিত মাতৃভূমিকে অতুলনীয় শৌর্য-বীর্যের

সঙ্গে অপরিসীম ত্যাগ স্বীকার করে বুকের রক্ত ঢেলে শৃঙ্খল মোচন করেছে যারা—সেই জীবনের আলেখ্য হয়ে উঠেছে নাটকটি। বাংলাদেশকে স্বাধীন করতে জাতি-ধর্ম-বর্ণ-লিঙ্গ-বয়স নির্বিশেষে দেশের আপামর নাগরিক ঝাঁপিয়ে পড়েছিল। এ প্রসঙ্গে মুক্তিযোদ্ধা কাদের সিদ্দিকী লিখেছেন—

‘বাংলার স্বাধীনতা যুদ্ধে ছাত্রলীগ, ছাত্র-ইউনিয়ন, শ্রমিক লীগ, কৃষক লীগ ও আওয়ামীলীগ সহ অন্যান্য প্রগতিশীল রাজনৈতিক দল ও গণসংগঠনগুলি গৌরবোজ্জ্বল ভূমিকা পালন করেছে। বিশেষত রাজনৈতিকভাবে সুশিক্ষিত প্রগতিশীল ছাত্র-সংগঠনগুলোর ভূমিকা স্বাধীনতাকে তরাস্বিত করেছে। আপোস আলোচনার অজুহাতে ইয়াহিয়া যখন সময় কাটাচ্ছিলো, তখন বাংলার ঘরে ঘরে ব্যাপক অবিশ্বাস ও সন্দেহ ঘনীভূত হচ্ছিল। ছাত্র-শ্রমিক সংগঠনগুলো ইতিমধ্যেই বুঝে নিয়েছিল, পশ্চিম-পাকিস্তানী কায়েমী স্বার্থবাদী চক্র বাঙালীর ন্যায় অধিকার আপোসে ছেড়ে দেবে না। কারণ এই কায়েমী স্বার্থবাদী সাম্রাজ্যবাদী চক্র যুগ যুগ ধরে বাঙালীকে শোষণ করে ফুলে ফেঁপে উঠেছে। বাঙালীর হাতে ক্ষমতা ছেড়ে নিজের স্বার্থহানি ঘটাতে পারেনা তারা।’^{২০}

‘দুরন্ত পদ্মা’ নাটকে সেই দৃষ্টিভঙ্গি পাওয়া যায়। চরিত্র সঞ্চয়নের ক্ষেত্রে বাংলাদেশের বিচিত্র শ্রেণির নাগরিক স্থান পেয়েছে এখানে। মেজর খালেদ, ক্যাপ্টেন মাহুজ ও ইস্ট পাকিস্তান রাইফেলস-এর হাবিলদার মান্নান—এরা মূলত কর্মের দিক থেকেই ছিল সৈন্য, যুদ্ধ-ব্যবসা ছিল এদের একমাত্র কাজ। বাকি চরিত্রদের মধ্যে আছে ছোট ব্যবসায়ী, শ্রমিক, চাষি, ছাত্র-ছাত্রী, ডাক্তার, ঘরের গৃহিণী ইত্যাদি সাধারণ নাগরিক। যেমন—ছাত্র লীগের মুক্তিযোদ্ধা রফিক, ছাত্র ইউনিয়নের মুক্তিযোদ্ধা অজিত, আওয়ামী লীগের যুবনেতা তাজিক আলি, বামপন্থী শ্রমিক নেতা জামাল উদ্দিন, সাধারণ শ্রমিক টিটু মিয়া, হিটলু মিয়া ও আজিজ, অবাঙালি বাংলাদেশ নিবাসী শ্রমিক মনু মিয়া, সাধারণ চাষি গেরু মিয়া, বাংলাদেশের মধ্যবিত্ত ব্যবসায়ী রহমান, চিকিৎসক ডা. সামসুদ্দিন, কিশোর বয়সী হাবিব এবং নারী চরিত্রগুলির মধ্যে আছে কলেজ ছাত্রী তথা মুক্তিযোদ্ধা শিরিন বানু ও তার মা তথা রহমানের স্ত্রী হামিদা বিবি, হিন্দু নার্স বিনতা, ছেলে হারানো একমাত্র সম্বল নাতি হাবিবকে চেয়ে বেঁচে থাকা মুন্না বিবির মতো চরিত্র। মুক্তিযুদ্ধে নিজেদের সামর্থ্য অনুযায়ী

এরা সকলেই কোনও না কোনও ভূমিকা পালন করেছে। কেউ সরাসরি যুদ্ধে অংশ নিয়েছে তো কেউ যোদ্ধাদের অন্যান্য প্রয়োজনে সাহায্য করেছে। মুক্তিযুদ্ধ ছিল বাংলাদেশের সাধারণ নাগরিকদের শোষণমুক্ত সমাজ গড়ার এক সাহসী সংগ্রাম। সেই সংগ্রামের নাটকীয় রূপ ‘দুরন্ত পদ্মা’। সেজন্যই নাটককার এখানে এত বিচিত্র সব চরিত্রের সমাহার ঘটিয়েছেন। নাটকটির কাহিনি বিশ্লেষণ করে দেখে নিতে পারব মুক্তির আশায় সাধারণ জনগণের আপসহীন দৃঢ় প্রতিজ্ঞাকে।

মুক্তিযুদ্ধের পরিকল্পনা ও উদ্দেশ্যের কথা নাটকের প্রথম দৃশ্যেই প্রকাশ পেয়েছে, সেই সঙ্গে ধরা পরেছে বেশ কিছু সমস্যাও। যুদ্ধ করার জন্য প্রয়োজনীয় অস্ত্র সংগ্রহ করা মুক্তিযোদ্ধাদের প্রথম ও প্রধান কাজ। তাই ল্যাফটানেন্ট মাফুজ, মান্নান, রফিক ও অজিতের শত্রু-শিবির থেকে অস্ত্র লুঠ করার পরিকল্পনা দিয়ে নাটকের শুরু। বিপরীত শক্তি পাকিস্তান সেনা অত্যাধুনিক অস্ত্রে সজ্জিত। সেখানে বাংলাদেশের জনগণের কাছে তেমন পর্যাপ্ত অস্ত্র না থাকায় মেজর খালেদ পরিকল্পনা করেন শত্রুর যাত্রাপথ নষ্ট করে তাদের অগ্রগতিতে বিলম্ব ঘটানোর। সেজন্যই রেলপথ, সেতু, সড়কপথ, বিমানবন্দর সমস্ত কিছুই নষ্ট করে দেওয়ার কথা বলে। এরকম পরিস্থিতিতে বামপন্থী শ্রমিক নেতা জামাল উদ্দিন এসে জানায়, পাটকলের শ্রমিকরা যুদ্ধে যোগ দিতে প্রস্তুত, কিন্তু তারা চায় অস্ত্র। মুক্তিযুদ্ধের সময় বাংলাদেশের কিছু নাগরিক এটাকে বাঙালিদের লড়াই ভেবে সেখানকার অবাঙালি বাসিন্দাদের প্রতি মারমুখী অবস্থান করে। কারণ তারা ভেবেছিল সমস্ত অবাঙালিই বাঙালির শত্রু ও পাকিস্তান সেনার সমর্থক। সেই দৃশ্য ধরা পড়ে মনু মিয়ার ওপর হিটলু, আজিজ, গেদুর চড়াও হওয়ার মধ্যে। শিরিন বানু এসে তার প্রাণ রক্ষা করে এবং জামাল উদ্দিন ও শিরিন বানু তাদের চিনিয়ে দেয়, আসল শত্রু পুঁজিপতি জমিদার ও পাকিস্তানি হানাদার বাহিনী। কোনও অবাঙালি সাধারণ নাগরিক তাদের শত্রু নয়। বাংলাদেশের এই গণ-অভ্যুত্থানে ভারতের প্রত্যক্ষ সাহায্য ছিল। সে দিকের ইঙ্গিত প্রথম দৃশ্যেই দেওয়া হয়েছে মুকুলের সংলাপে—

‘...দেখলাম এপার বাংলা ওপার বাঙলা এক দিল্ হয়ে গেছে। গঙ্গা-পদ্মায় যে একই ধারা বয় তা নতুন করে দেখে এলাম শিরিন। শুধু পশ্চিম বাঙলাই নয়, সারা ভারত আজ আমাদের সঙ্গে।’^{২৪}

প্রথম দৃশ্যে নাটকের যে অভিমুখ নির্দেশিত হয়েছে, পরবর্তী দৃশ্যগুলিতে কাহিনির আবর্তন ঘটেছে সেই পথ ধরেই। পূর্ব-পাকিস্তান তথা বাংলাদেশের জনগণের স্বাধীনতার লড়াই যেমন নাটককার দেখিয়েছেন, তেমনি পাকিস্তান বাহিনীর হানাদার রূপও দেখিয়েছেন। এখানে পাকিস্তান সেনাকে দেখানো হয়েছে লোলুপ, ধর্ষক, নৃশংস, লুঠেরা হিসেবে। দ্বিতীয় দৃশ্যে সেরকমই একটি চিত্র পায়। পাকিস্তান সেনা উজির খান ও বরকতুল্লা বাংলাদেশের লুঠ করা সম্পত্তির ভাগাভাগি নিয়ে কোন্দলে ব্যস্ত। এমন সময় পাকিস্তান সেনার ক্যাপ্টেন সাজ্জাদ উজির খান ও বরকতুল্লা খানকে বাংলাদেশে এমন অত্যাচার চালাতে বলে যেন সেখানে ‘কারবেলা’-র হাহাকার ওঠে। যাতে তাদের গণমুক্তির সংগ্রাম চিরতরে স্তব্ধ হয়ে যায়। এখানে আমজাদ মিয়া নামে এক চরিত্রের আগমন ঘটেছে। যে বাংলাদেশের একজন মহাজন ও জোতদার এবং পশ্চিম-পাকিস্তানের শাসকগোষ্ঠীর সমর্থক। বাংলাদেশের সাধারণ জনগণের যুদ্ধে এই আমজাদ মিয়ার মতো পুঁজিপতিরা নিরল্জ্জের মতো পাকিস্তান সেনাবাহিনীর সমর্থন করে গেছে। অথচ নাটকে দেখা যায় পাকিস্তান সেনাবাহিনী তার প্রতি চাকরতুল্য ব্যবহার করে। নাটককার তাকে একটা বিশ্বাসঘাতক চরিত্ররূপে তৈরি করেছেন। সেজন্যই মুক্তিযোদ্ধারা পাকিস্তান সেনার ছাউনি ঘিরে ফেললে সেই তাদের পথ চিনিয়ে সেখান থেকে বার করে।

প্রাথমিক যুদ্ধে পাকিস্তান সেনারা রণে ভঙ্গ দিয়ে পালায়। যুদ্ধে আহত মুক্তিযোদ্ধার সংখ্যা বাড়ে। হাসপাতালে জায়গার অভাব হওয়ায় ল্যাফটানেন্ট মারফুজ তাঁবু খাটিয়ে হাসপাতাল গড়ার যুক্তি দেন। চিকিৎসার প্রয়োজনীয় ওষুধ নেই। সেজন্য দরকার মিত্র-দেশগুলির সাহায্য। তৃতীয় দৃশ্যে মেজর খালেদ রণকৌশলের কথা বলেছে— ক্যান্টনমেন্টের দু’মাইল দূরে পাকিস্তান বাহিনীর যে ‘অ্যাডভান্স পজিশন’ আছে তা ভঙ্গ করতে হবে এমনভাবে যেন তারা ক্যান্টনমেন্টের বাইরে থাকতে ভয় পায়। মেজর খালেদের কথায়—

‘ওরা যাতে ক্যান্টনমেন্টের বাইরে পজিশন নিতে ভয় পায় তার ব্যবস্থা করতে হবে। ...অস্ত্র ও রসদ আসার ওদের সমস্ত পথ বন্ধ করে দোব। দানা-পানির অভাবে ওরা শুকিয়ে মরবে। মুজিবের কথা মনে রাখবেন— ওদের মারতে হবে ভাতে, মারতে হবে পানিতে।’^{২৫}

চতুর্থ দৃশ্যে হামিদা বিবি ও রহমানের কথায় উঠে এসেছে কয়েকটি তথ্য। আমরা আগেই বলেছি, বাংলাদেশে এই সময় যখন বাঙালিদের উপর পাকিস্তান-বাহিনী অত্যাচার করছে তখন বেশি অত্যাচারিত হয়েছিল হিন্দু সম্প্রদায়। ফলে তাদের অনেকেই সেখান থেকে পালিয়ে ভারতে চলে আসে। হিন্দুদের অত্যাচারিত হওয়ার সেই কথায় শুনতে পায় তাদের সংলাপে। ২৫ মার্চ ১৯৭১ পাকিস্তান-বাহিনী ঢাকা বিশ্ববিদ্যালয় আক্রমণ করলে সেখানে বহু ছাত্র-ছাত্রী মারা যায়। ছাত্রীদের হোস্টেল রোকেয়া হলে পাকিস্তান-বাহিনী গণধর্ষণ চালায়। ধর্ষণের হাত থেকে নিজেদের সম্মান বাঁচাতে প্রায় ৫০টি ছাত্রী হোস্টেলের ছাদ থেকে লাফ দিয়ে আত্মহত্যা করে।^{২৬} সে কথাও শুনতে পায় হামিদার কণ্ঠে—

‘লড়াই ইজ্জতের জন্য। শোননি, ঢাকায় ইজ্জত রক্ষার জন্য ছাত্রীরা ছাদ থেকে লাফিয়ে পড়ে জান্ দিয়েছে, তবু দুশমনের হাতে ধরা দেয়নি।’^{২৭}

তাদের কথোপকথনের মাঝে মনু মিয়া নার্সের বেশে বিনতাকে নিয়ে হাজির হয়। হিন্দু হওয়ায় প্রাণ বাঁচাতে বিনতার পরিবার ভারতে চলে আসে, কিন্তু বিনতা নিজের দেশ ছেড়ে যায়না। রাবেয়া খাতুন নাম ধারণ করে প্রথমে মনু মিয়াদের বস্তিতে থাকে, কিন্তু সেখানে সমস্যা হতে পারে ভেবে মনু মিয়া শিরিনের বাড়িতে তার থাকার ব্যবস্থা করে। এই সঙ্কটময় পরিস্থিতিতে বিনতার ভারতে চলে যাওয়াকে হামিদা শ্রেয় মনে করলে বিনতা উত্তর দেয়—

‘যে দেশের মাটিতে আমি জন্মেছি, যে দেশের জল-বায়ুতে আমার প্রাণ বেঁচে আছে, তাকে ছেড়ে যেতে আমি পারবো না মা।’^{২৮}

বিনতা যেহেতু নার্সিং পাস করেছে, সেহেতু এই সংকটকালে ডা. সামসুদ্দিনের সঙ্গে আহত মুক্তিযোদ্ধাদের সেবা করতে সে আত্মনিয়োগ করে। এরপর সেখানে শিরিন বানু তিনটি বন্ধুকে নিয়ে এসে তার বাবা রহমান, মা হামিদা বিবি এবং বন্ধু বিনতাকে দেয়, যাতে তারাও সংকটকালে যুদ্ধে অবতীর্ণ হতে পারে।

বাংলাদেশের কিছু জোতদার শ্রেণির লোক ও তাদের অনুগামী গোষ্ঠী প্রথম থেকেই পাকিস্তান-বাহিনীর সমর্থক ছিল। কাদের সিদ্দিকী জানান, তারা দালালদের মতো কাজ করেছিল এই সময়। তাদের মধ্যে বেশ কিছুজন একত্রে শান্তিরক্ষা কমিটি গঠন করেছিল। কিন্তু সেই কমিটি শান্তি রক্ষার নামে সমস্তরকম অশান্তি ছড়ায়। রাজাকার বানানো,

ঘরবাড়ি জ্বালানো, লুণ্ঠতরাজ, নারী অপহরণ, ধর্ষণ, খুন সবই তারা করে।^{১৯} এরা প্রথম থেকেই চেয়েছিল পাকিস্তানকে ইসলামিক রাষ্ট্রে পরিণত করতে। সেজন্য তারা সেখানে বসবাস করা হিন্দুদের বিতাড়িত করতেও পিছপা হয়নি।^{২০} চতুর্থ দৃশ্যে রহমানের সঙ্গে আমজাদ মিয়া'র কথোপকথনে এরকম কথাই উঠে আসে। আমজাদ মিয়াও শান্তি রক্ষা কমিটি গঠনের কথা বলে এবং হিন্দুরা যাতে দেশ ছেড়ে চলে যায় সেই মতও ব্যক্ত করে।

পঞ্চম দৃশ্যে যুদ্ধের প্রস্তুতি নিতে দেখা যায় মুক্তিযোদ্ধাদের। যুদ্ধে কার কী দায়িত্ব হবে তা নির্দিষ্ট করে মেজর খালেদ। মাফুজ, মান্নান ও ছাত্রযোদ্ধা রফিক, অজিতদের সঠিক পজিশন নিয়ে সঠিক সময় 'অ্যামবুশ' কায়দায় অর্থাৎ অতর্কিতে পাকিস্তান বাহিনীর উপর হামলা করার পরামর্শ তথা আদেশ দেয় মেজর খালেদ। এরকম হঠাৎ আক্রমণ পাকিস্তান বাহিনীকে দিশাহারা করে দেবে। আর শিরিন বানুর নেতৃত্বে গঠিত 'রোশেনারা বাহিনী'-কে শহরের রাস্তার মোড়ে, বাড়ির ছাদে ইত্যাদি বিভিন্ন জায়গায় মোতায়েন থাকতে বলে। যেন পাকিস্তানি সেনা তাড়া খেয়ে শহরে প্রবেশ করতে গেলে তাদের হাতে আক্রান্ত হয়। এরকম পরিকল্পনা চলার সময় তাজিক ও জামাল এসে মেজর খালেদকে জানায়, কিছু লোক পশ্চিমা শ্রমিকদের উত্তেজিত করার জন্য উর্দুতে ইশতেহার ছাপিয়ে অবাঙালি বস্তিতে ছড়াচ্ছে এবং আওয়ামী লীগের সমর্থকদের বাড়ি চিহ্নিত করছে। মিত্রবেশী এই শত্রুদের খুঁজে বার করার দায়িত্ব তাজিক ও জামালদের উপরই ন্যস্ত করে মেজর খালেদ। সাধারণ নাগরিকদের হুঁশিয়ার করার দায়িত্ব পায় কিশোর বয়সী হাবিব। কথামতো সে কাজ করতে থাকলে আমজাদ মিয়া তাকে বাধা দেয়। এমন সময় সেখানে শিরিন ও মুকুল এসে পড়লে সে কুটিল কথার আশ্রয় নিয়ে নিজেকে তাদেরই একজন বলে দাবি করে। কিন্তু এই সংকটের সময় শত্রু চিনতে বাংলাদেশের সাধারণ মানুষ ভুল করেনি। ষষ্ঠ দৃশ্যে শিরিন, মুকুল ও আমজাদের কথোপকথনে উঠে এসেছে—

শিরিন: কিছু পশ্চিমা দালাল দিয়ে আপনি এখানে দাঙ্গা বাঁধার তালে আছেন।

আমজাদ : ছিঃ ছিঃ ছিঃ! সব বানানো কথা। তুমি শিক্ষিতা মেয়ে। এসব বাজে কথায় তুমি কান দাও!

মুকুল : এখানে কিছু বাঙালি দালালও আপনার জুটেছে।

আমজাদ : এসব শয়তানদের রটনা, শয়তানদের রটনা। হারামীদের ধরতে পারলে কোতল করে ছাড়বো।

শিরিন : মনে রাখবেন রটনা যদি ঘটনা হয় তবে কোন জালেমই রেহাই পাবে না—ধর থেকে মুন্ডু খসে পড়বে।

...

মুকুল: আপনার গোলায় ধান পাওয়া যাবে?

আমজাদ : হে-হে-হে! এতে আবার কথা আছে নাকি? যখন খুশি... যখন খুশি। চাই কি এখনো নিয়ে যেতে পারে।

মুকুল : না, এখন প্রয়োজন নেই। মুক্তিযোদ্ধাদের জন্য প্রয়োজন হলে নোব। কিন্তু আমরা নজর রাখবো কোনো জোতদার বা মহাজন গোলা থেকে ধান-চাল বাইরে সরাই কিনা।^{৩১}

পূর্বেই বলেছি নাটককার মুক্তিযুদ্ধের দুটি উদ্দেশ্যের কথা ইঙ্গিত করেছেন—প্রথমটি হল পাকিস্তানি হানাদারদের মুক্ত করে স্বাধীন বাংলাদেশ প্রতিষ্ঠা এবং শোষণমুক্ত সমাজ-ব্যবস্থা গঠন হল দ্বিতীয়। সেজন্য বহিঃশত্রুর সঙ্গে লড়াই একমাত্র কাম্য নয়, লড়াইয়ের অভিমুখ অন্তঃশত্রুর দিকেও। আমজাদ মিয়ার মতো জোতদার, মহাজনদের হাত থেকেও সাধারণ মানুষকে রক্ষা করতে হবে। ফলে নাটকে সাধারণ মানুষ একদিকে যেমন আক্রমণ করেছে পাকিস্তানি বাহিনীকে, তেমনি আর একদিকে তারা লড়াই চালিয়েছে জোতদার আমজাদ মিয়ার বিরুদ্ধে। নাটকের ষষ্ঠ দৃশ্যে এই আমজাদ মিয়ার অপকীর্তির কথা উঠে আসে। যেমন মুন্না বিবির একমাত্র সন্তান তথা হাবিবের বাবাকে জমির জন্য খুন করেছে। হিটলু তার সম্বন্ধে বলে—

‘হারামী বজ্জাত। চাষীদের কী ভাবে ঠকায়! আর শালা আমাদের কাছ থেকেই কি কোন সুদ খায়! একবার কাউকে টাকা ধার দিলে জোঁকের মত তার খুন চুষে নেবে। সারা জীবনেও তার দেনা শোধ হবে না।’^{৩২}

এই জোতদার শ্রেণির লোকেরা পাকিস্তানের হানাদার শক্তির দালালি করেছিল। নাটকেও দেখি আমজাদ মিয়া কখনও গোপন খবর দিয়ে, কখনও আঞ্চলিক ম্যাপ দিয়ে পাকিস্তান

বাহিনীর সাহায্য করে। ফলে দীর্ঘ দিনের সঞ্চিত ক্ষোভে ও মুক্তিযুদ্ধে তাদের বিরূপ আচরণে অতিষ্ঠ হয়ে টিটু, হিটলু, গেরুর মতো সাধারণ শ্রমিক ও চাষিরা আমজাদ মিয়ার বাড়ি চড়াও হয়। কিন্তু সেই মুহূর্তে আমজাদ বাড়িতে না থাকায় তার প্রাণ বেঁচে যায়। এখানে আরও দুটি সত্য উঠে এসেছে— বাংলাদেশের গণ-অভ্যুত্থানে ভারতের সাহায্য; ভারত থেকে চিকিৎসার জন্য পাঠানো হয়েছে ওষুধপত্র। আর অপরদিকে পাকিস্তানের গুপ্তচর আমজাদ মিয়ার কাছে ভোগ করার জন্য চেয়েছে সুন্দর সুন্দর বাঙালি নারী।

পূর্ব পরিকল্পনা অনুযায়ী রফিকুল সহ সকলে সম্মুখ যুদ্ধে নিজেদের পজিশন নিয়ে বন্দুক তাক করে শত্রুর অপেক্ষা করে। বাংলাদেশের যুদ্ধে ভারতের ভূমিকা বারবার নাটককার তুলে ধরেছেন। অষ্টম দৃশ্যও দেখি ভারতের আকাশবাণী একমাত্র সংবাদ পাওয়ার মাধ্যম হয়েছে বাংলাদেশের কাছে। মুক্তিযোদ্ধাদের জন্য লজেন্স ও বিস্কুট পাঠিয়েছে ভারত। বাংলাদেশ প্রতিষ্ঠা হবে জাতি-ধর্ম নিরপেক্ষ আদর্শে সেকথাও ব্যক্ত হয়েছে। সেজন্য বিনতার মুখ থেকে হঠাৎ করে ‘ভগবান’ শব্দটি উচ্চারণে হলে সে অপ্রস্তুত হয়ে পড়ে। তখন তাকে রফিক অভয় দিয়ে বলে—

‘রাবেয়া খাতুন নাম নিলেও আপনি যে হিন্দু মেয়ে, আমরা জানি। আপনি হিন্দু হয়েই এই বাংলাদেশে থাকবেন। আপনাকে আমরা শ্রদ্ধা করি।’^{৩৩}

শত্রুর জন্য অপেক্ষারত অবস্থায় হঠাৎ আকাশে যুদ্ধবিমানের শব্দ শোনা যায়। ট্রাকে চেপে শত্রুরা তাদের দিকে এগোতে থাকলে ধৈর্যচ্যুত হয়ে পরিকল্পনামাফিক সময়ের আগেই রফিক তাদের উদ্দেশ্যে গুলি চালায়। ফলে শত্রুরা সতর্ক হয়ে যায় এবং পরিকল্পনা ব্যর্থ হয়। পরবর্তী দৃশ্যে সেই নিয়ে মেজর খালেদ রুশ্ট হয়। তিনি ক্ষোভ প্রকাশ করেন রফিকের অনভিজ্ঞ পদক্ষেপের জন্য। সেজন্য রফিকের সঙ্গে মেজর খালেদের তর্কাতর্কি বাঁধে। এখানে বিশেষভাবে লক্ষণীয় যে, রফিকের মধ্যে ছাত্রসুলভ হঠকারিতা এবং সে যেহেতু বিজয়ী আওয়ামী লীগের ছাত্র সংগঠনের সদস্য সেহেতু তার মধ্যে বিজয়ের গর্ব, আত্ম-অহংকার ধরা পড়ে। তার বলতে বাধে না—

‘...আওয়ামী লীগ কারো হুকুম তামিল করে চলতে বাধ্য নয়। গোটা বাংলাদেশের জনমত তার পিছনে আছে।’^{৩৪}

পরে তাজিক আলির মধ্যস্থতায় সেই দ্বন্দ্বের অবসান ঘটে। এদিকে অবাঙালি মনু মিয়াকে খুন করতে উদ্যত হয় আমজাদ মিয়া। কারণ মনু মিয়া পশ্চিমী হয়েও পাকিস্তানকে সমর্থন করত না। তাকে প্রাণ বাঁচাতে পালিয়ে আসতে হয়েছে মুক্তিযোদ্ধাদের আস্তানায় এবং শেষ পর্যন্ত মেজর খালেদের দলে এসে সে আশ্রয় পেয়েছে।

দশম দৃশ্যে মেজর খালেদ ও মুক্তিযোদ্ধাদের সমস্ত খবর আদায় করতে পাকিস্তান বাহিনীর গুপ্তচর মোবারক দরবেশ ছদ্মবেশে গ্রামে হাজির হয়। মুন্না বিবির কাছে সমস্ত খবর আদায় করে নিতেও সক্ষম হয়। কিন্তু শিরিন, রফিক, হাবিব সেখানে সঠিক সময়ে এসে তাকে বন্দি করে মেজর খালেদের শিবিরে বিচারের জন্য নিয়ে যায়। বাংলাদেশে এই সময় একদল বাঙালি পাকিস্তানের শাসকদের দালালি করে গেছে। তারা কোনও মতে বাংলাদেশের মুক্তিযুদ্ধকে সমর্থন করেনি। আমজাদের পরিচয় আগেই দেওয়া হয়েছে, এই মোবারকও সেই রকম এক দালাল। সে বাঙালি হয়েও পাকিস্তান সেনার হয়ে গুপ্তচরবৃত্তি করেছে। এরা পাকিস্তানকে ইসলামিক রাষ্ট্র বানানোর পক্ষে ছিল। তাই সে দর্পের সঙ্গে বলতে পারে—

‘যারা পাকিস্তানের শত্রু তাদের খবর জোগাড় করা ইসলামের ফরমান।
সেই ফরমান তামিল করতে গিয়ে যদি জান্ যায় তবে তা হবে
কোরবানি।’^{৩৫}

পরবর্তীতে দেখা যায় এই মোবারক বিনতাকে ফাঁসানোর চেষ্টা করে। বিনতা ক্রমশ মেজর খালেদ সহ সমস্ত মুক্তিযোদ্ধাদের কাছে বিশ্বাসের পাত্র হয়ে উঠেছিল, সে নানা ভাবে মুক্তিযুদ্ধে নিজের কর্তব্য পালন করেছে। মোবারকের উদ্দেশ্য ছিল বিনতাকে তাদের কাছে বিশ্বাসঘাতক করে তোলা, যাতে পরবর্তীতে মুক্তিবাহিনীর মধ্যে এক সন্দেহের বাতাবরণ তৈরি হয়, কেউ কাউকে বিশ্বাস করতে না পারে। সেই কাজে মোবারক কিছুটা সার্থকও হয়, মেজর খালেদ সহ সাধারণ মুক্তিযোদ্ধারা বিনতাকে বিশ্বাসঘাতকই মনে করে, তাকে তারা শাস্তি দিতে চায়; কিন্তু শিরিন ও ডা. সামসুদ্দিনের মধ্যস্থতায় তার সমাধান হয়। শত্রুর তৈরি করা ফাঁদে তারা পা দেয়নি।

নাটকের পরবর্তী ঘটনা নাটকীয়ভাবে এগিয়েছে। মোবারক পাকিস্তানি সেনাদের কাছে অত্যন্ত প্রয়োজনীয়। তাকে উদ্ধার করার সঙ্কল্পে আমজাদ শিরিনকে অপহরণ করে

ক্যাপ্টেন সাজ্জাদের হাতে তুলে দিয়েছে। সাজ্জাদ শিরিনকে বশে আনতে চাবুক মেরেছে, কিন্তু তার মাথা নোয়াতে পারেনি, তার লজ্জা হরণও করতে পারেনি। এখানে শিরিনের মধ্যে এক বীর মুক্তিযোদ্ধার দৃঢ়তা ধরা পড়ে। শেষপর্যন্ত রফিক, অজিত, মুকুল সহ মুক্তিবাহিনী শিরিনকে উদ্ধার করে এবং সেখানেই আমজাদকে হত্যা করে। নাটকের অগ্রগতিতে দেখা যায় পাকিস্তানি সেনারা সমস্ত শক্তি নিয়ে মুক্তিকামী বাংলাদেশের উপর ঝাঁপিয়ে পড়ে, মানবতার সমস্ত সীমা তারা লঙ্ঘন করে, হাসপাতালেও বোমা মারতেও তারা পিছপা হয়না। শহর অঞ্চল ক্রমশ তাদের দখলে চলে আসে। এরই মধ্যে অপরদিকে গ্রামে গ্রামে সাধারণ মানুষ সংগঠিত হতে শুরু করেছে। শেষপর্যন্ত মুক্তিযোদ্ধারা শহর ছেড়ে গ্রামে গ্রামে ছড়িয়ে পড়ে, গেরিলা পদ্ধতিতে সেখান থেকে যুদ্ধ চালিয়ে যাওয়ার পরিকল্পনা আঁটেন। যুদ্ধময় বাংলাদেশের চিত্র ধরা পড়ে হামিদা ও রহমানের কথোপকথনে—

হামিদা : কে কোথায় চলে গেছে জানি না। কে বেঁচে আছে, কে মরে গেছে তাই বা কে বলবে!...গুলি খেয়ে সামনে পড়ে গেলেও ধরে তুলবার কেউ নেই। এতদিন শুনেছি, আজ নিজের চোখে দেখলাম ওরা কী ভাবে মানুষ খুন করে। কসাই...কসাই...

রহমান : শহরটার দিকে চেয়ে দ্যাখো—কী ভাবে দাউ দাউ করে আগুন জ্বলছে। আশমানটা যেন রাঙা সিঁদুরে মেঘে ছেয়ে গেছে...^{১৩৬}

এই যুদ্ধে বহু মুক্তিযোদ্ধা শহীদ হয়, আহতও হয় বহু। নাটকেও দেখি গেরুর গুলি লেগেছে, হিটলু গুরুতরভাবে আহত, সামসুদ্দিনের হাসপাতাল ধ্বংস হয়ে গেছে, হাবিব নিজের চোখ হারিয়েছে, বিনতাও শহীদ হয়েছে। চারিদিকেই কেবল হাহাকারের ধ্বনি, আর ধ্বংসের চিহ্ন। এসবের মাঝে জামাল মুজিবনগরে স্বাধীন বাংলাদেশের স্বাধীন সরকার গঠিত হওয়ার খবর নিয়ে আসে। সে বলে—

‘পলাশীর আম্রকাননে যে স্বাধীনতা সূর্য একদিন অস্ত গিয়েছিল, মুজিবনগরের আম্রকাননে বাংলাদেশের সেই স্বাধীনতা সূর্যের আবার উদয়।’^{৩৭}

এই সংবাদ প্রত্যেকটা মুক্তিযোদ্ধাদের মনে লড়াই করার সাহস, শক্তি ও আশা জোগায়। নাটকের সমাপ্তিতে মেজর খালেদ বিশ্ববাসীর কাছে বাংলাদেশের পাশে থাকার ও সাহায্য করার আহ্বান জানিয়েছে।—

‘দুনিয়ার স্বাধীনতাপ্রিয় মানুষ, আপনারা শুনুন, পাকিস্তানের জন্মকাল থেকে সামরিক জুন্টার অত্যাচারে বাংলাদেশ ক্ষতবিক্ষত, পশ্চিমা বাইশটি পরিবারের শোষণে আমরা সর্বস্বান্ত। সেই অত্যাচার ও শোষণ থেকে মুক্তির জন্য বাঙালী জাতি অস্ত্র ধরতে বাধ্য হয়েছে। আমাদের মনে বল আছে, বুকে সাহস আছে, আছে সংগ্রামী ঐক্য—কিন্তু নেই আমাদের অস্ত্র। আপনারা আমাদের অস্ত্র দিন, স্বাধীন বাংলাদেশকে স্বীকৃতি দিন। জয় আমাদের হবেই।’^{৩৮}

দূর্বীর বাংলা :

বাংলাদেশের মুক্তিযুদ্ধ যখন চলছে সেই সময় অনিল দে লিখেছেন ‘দূর্বীর বাংলা’ একাঙ্কটি। ‘অভিনয়’ পত্রিকায় ১৯৭১ সালে এপ্রিল-মে সংখ্যায় এটি প্রথম প্রকাশিত হয়। নাটকের পটভূমি ও বিষয় সম্পর্কে নাটককার স্পষ্ট জানিয়েছেন—

‘এ নাটকের পটভূমি বাংলা দেশের একটি গ্রাম। বাংলা দেশের মুক্তিযুদ্ধ এখন তার মধ্যগগনে। কোনো দেশের যুদ্ধ যখন সেই দেশের মানুষের প্রাণের তাগিদ হয়, তখন তাকে আমরা বলি মুক্তি যুদ্ধ। বাংলা দেশের যুদ্ধ সেই সংগ্রাম, যে সংগ্রামে গোটা একটা জাত মুক্তির পথ খুঁজছে। লড়াই শুরু হয়েছে গ্রামে গ্রামে, শহরে শহরে। লড়ছে সবাই। কেউ সামনে, কেউ পেছনে। এ নাটকে পেছনে যারা লড়ছে, তাদের লড়াইকে তুলে ধরা হয়েছে।’^{৩৯}

দুই মুক্তিযোদ্ধা সাহাবুদ্দিন ও সোরাবুদ্দিনের গৃহের মধ্যেই নাটকের ঘটনা-সংঘাত এগিয়েছে। এখানেই বিভিন্ন চরিত্রের সংলাপের আদান-প্রদানের মধ্যে মুক্তিযুদ্ধের বিভিন্ন কথা উঠে এসেছে। বর্তমানে দুই ভাই মুক্তিযুদ্ধে লিপ্ত, বাড়িতে তাদের বৃদ্ধা মা একাই থাকে। ঘরের চেহারা এক দরিদ্র চাষির ঘরের অনুরূপ।

নাটকের কাহিনির পরিধি থেকেছে এক রাত্রি। নেপথ্যে আবহে মুহূর্মুহু শোনা যায় বোমারু বিমানের গর্জন, বোমার বিস্ফোরণ, আর্ত চিৎকার এবং মিলিটারি বুটের ভারী শব্দ। চারিদিকে সন্দেহের বাতাবরণ। তাই প্রথম থেকেই সাহাবুদ্দিন ও সোরাবুদ্দিনের মাকে দেখা যায় যখনই তার বাড়িতে কেউ দরজা ঠুকেছে তখনই সে একটি বাঁটি উঁচিয়ে দরজা খুলেছে। এমনকি নয়-দশ বছর বয়সি ইশাক ক্ষেত্রেও তার ব্যতিক্রম ঘটেনি। ইশাকের সঙ্গে মায়ের কথোপকথনে ধরা পড়ে পাকিস্তান সেনার অত্যাচারের এক নির্মম চিত্র। ইশাকদের বাড়িতে পাকিস্তান সেনা এসে তোলপাড় করে, তার বাবাকে ধরে নিয়ে গেছে, দুজন পাঞ্জাবী সেনা তার মা গর্ভবতী জেনেও তাকে ধর্ষণ করেছে—এই নির্মম অত্যাচারের জন্য তার গর্ভের সন্তান নষ্ট হয়ে গেছে। এই ধরনের অত্যাচার বাংলাদেশের শিশু মনেও ক্রোধ জাগিয়ে তোলে, যা ইশাকের কথাতেই স্পষ্ট—

‘দাদী, মুজীব চাচা আমারে তার দলে নিতি পারে না? আম্মো তাইলে যুদ্ধ করতাম। বাবারে ছাড়ায় নে আসতাম। আমার ছোট্ট ভাইডারে যারা মারিছে তাগের কবর দেতাম।’^{৪০}

নাটকের আরেকটি চরিত্র আফতাব অস্ত্র-শস্ত্র নিয়ে মুক্তিযুদ্ধে লিপ্ত হয়নি, কিন্তু সশস্ত্র যোদ্ধাদের বাইরে থেকে সাহায্য করেছে—যুদ্ধের পরিস্থিতিতে এলাকাবাসীদের সচেতন করেছে, আওয়ামী লীগের বিভিন্ন বার্তা সকল বাসিন্দাদের বাড়িতে পৌঁছে দিয়েছে, পাকিস্তানি সেনাদের বিভিন্ন খবর মুক্তিযোদ্ধা ও আওয়ামী লীগের অফিসে নিয়ে গেছে এবং মুক্তিযোদ্ধাদের জন্য খাবারের বন্দোবস্ত করেছে। আফতাব এবং মায়ের কথোপকথনে জানতে পারি গ্রামের চারিদিক পাকিস্তানি সেনারা ঘিরে ফেলেছে। আফতাব এরকম পরিস্থিতিতে গ্রামের সকল ঘরে আওয়ামী লীগের বার্তা পৌঁছে দিয়েছে—সকলে যেন পাকিস্তানি সেনার প্রতি সম্পূর্ণ অসহযোগিতা করে।

কাহিনির অগ্রগতিতে দেখা যায় পাকিস্তানি সেনাবাহিনীর দুজন সেনা দেবতোষ ও মইজুদ্দিন ছদ্মনামে সাহাবুদ্দিন ও সোরাবুদ্দিনের মায়ের কাছে এসেছে। আসলে তারা পাকিস্তানি সেনার গুপ্তচর। এসেছে আওয়ামী লীগের গুপ্ত অফিস ও বেতারকেন্দ্রের সন্ধান জানতে। এখানে মায়ের চরিত্রে গ্রাম্য সরলতা এবং মাতৃহের মহানুভবতা ধরা পড়ে। গুপ্তচর দুজন মায়ের কাছে তাদের অসহায়তার কথা বলেছে এবং নিজেদের পাকিস্তানি বাহিনীর বিদ্রোহী সৈনিক হিসেবে পরিচয় দিয়েছে। মা সেই কথাতেই বিশ্বাস করে তাদের সেবা-শুশ্রূষা করছে, রাত্রে খাবার দিয়েছে। এর মধ্যে তারা বিভিন্ন অছিলায় আওয়ামী লীগের গোপন ঘাঁটির সন্ধান জেনে নেওয়ারও চেষ্টা করেছে। কিন্তু তাদের দুর্ভাগ্য মায়ের কাছে সেই সন্ধান ছিল না। এমন সময় সেখানে আফতাব এবং পরে ইশাক এসে উপস্থিত হয়। সে তাদের সন্দেহের চোখে দেখে। তারা আফতাবকে কথার ছলে ভুলাতে পারে না, যেমন করে মাকে ভুলিয়েছিল। ইশাক প্রথম দেখাতেই দেখাতেই তাদের চিনতে পারে যে, এই দুজন সেনাই তার মাকে ধর্ষণ করেছিল। ইশাক সেখান থেকে বেড়িয়ে গিয়ে সোরাবুদ্দিনের কাছে সেই খবর দেয়। এদিকে আফতাবের কাছে কোনও খবর না পেয়ে সেনা দুজন আফতাবকে মায়ের অপরাধী প্রতিপন্ন করার চেষ্টা করে এই বলে যে, আফতাব তার সন্তানদের পাকিস্তান সেনাদের কাছে ধরিয়ে দিয়েছে; মাও নিজের সন্তানের বিপদের কথা শুনে আফতাবকে অবিশ্বাস করেছে। ঠিক এরকম পরিস্থিতিতে সোরাবুদ্দিন, ইশাক সহ কয়েকজন মুক্তিযোদ্ধা সশস্ত্র অবস্থায় সেখানে উপস্থিত হয়। শেষপর্যন্ত দ্বন্দ্বযুদ্ধে ইশাক দেবতোষের বন্দুকের গুলিতে নিহত হয় এবং সেই প্রতিশোধে মা বাঁটি দিয়ে দেবতোষকে কুপিয়ে খুন করে।

মুক্তির রাইফেল :

বেরটোল্ট ব্রেখট স্পেনের গৃহযুদ্ধের (১৯৩৬-১৯৩৯) পটভূমিকায় রচনা করেছিলেন 'সেনোরা কারারের রাইফেল' (১৯৩৭) নাটকটি, সেই নাটকের অবলম্বনে স্বপন কুমার মিত্র পাকিস্তানের গৃহযুদ্ধ তথা বাংলাদেশের মুক্তিযুদ্ধের পটভূমিকায় রচনা করলেন 'মুক্তির রাইফেল' একাঙ্কটি। শুরুতে নাটককার ব্রেখটের একটি উক্তি দিয়ে নাটকটির রাজনৈতিক দিক ব্যক্ত করেছেন—

‘সুন্দর সুন্দর কথার মালা গাঁথতে পারলেই শিল্প হবে এমন কোন মানে নেই। শিল্প মানুষকে নাড়া দেবে কি করে যদি মানুষের ভাগ্য শিল্পকে নাড়া না দেয়?’^{৪১}

নাটকের কাহিনি বাংলাদেশের বাংলাদেশের এক খেটে খাওয়া পরিবারের মধ্যে আবদ্ধ। সমগ্র বাংলাদেশ জুড়ে মুক্তিযুদ্ধ প্রবল আকার ধারণ করেছে। সেই মুক্তিযুদ্ধের একটি রাতেই কাহিনি আবর্তিত হয়েছে। রোশনারা বিবি তার দুই ছেলে হাসান ও হাবিবরকে চোখের আড়াল হতে দেয় না, যুদ্ধ থেকে তাদের বিরত রাখার চেষ্টা করে। কিন্তু হাসান ও হাবিবরের মধ্যে আছে যুদ্ধের প্রতি আকর্ষণ ও উত্তেজনা। যেখানে গোটা একটি জাতি শোষণমুক্ত সমাজ ও রাষ্ট্র গড়ার তাগিদে যুদ্ধে লিপ্ত হয়েছে সেখানে তারা যুদ্ধ থেকে বিরত থাকতে ইচ্ছুক নয়। তাবলে এই নয় যে রোশনারা ভীতু বা স্বার্থপর। রোশনারার স্বামী তথা হাসান ও হাবিবরের বাবা মুক্তিযুদ্ধে যখন সামিল হয়েছিল তখন রোশনারা হাসিমুখেই বিদায় জানিয়েছিল। কিন্তু সেই যুদ্ধে সে শহীদ হলে রোশনারা নিজেকে ও তার দুই ছেলেকে যুদ্ধ থেকে দূরে ও নিরপেক্ষ রাখার চেষ্টা করেছে। এখানে আসলে তার মাতৃ মনের স্বাভাবিক দুর্বলতা কাজ করেছে, তারাই তার বেঁচে থাকার একমাত্র আশ্রয়, সে আর তাদের হারাতে চায় না।

ঘটনার অগ্রগতিতে ওসমান ও অজয় রোশনারার বাড়িতে এসে উপস্থিত হয়। উভয়েই মুক্তিযোদ্ধা, ওসমান রোশনারার ভাই তথা হাসান ও হাবিবের মামা এবং অজয় তাদের প্রতিবেশী। হাসান ও হাবিবের বাবার দুটো রাইফেল নেওয়ার উদ্দেশ্যেই তাদের আগমন। কিন্তু রোশনারা সেই রাইফেল তাদের হাতে তুলে দিতে চায় না, কারণ এগুলিই তার স্বামীর শেষ স্মৃতি। তাদের পারস্পরিক কথোপকথনে প্রকাশ পেয়েছে মুক্তিযুদ্ধের যাবতীয় দিক। যেমন যুদ্ধের লক্ষ্য সম্বন্ধে অজয় রোশনারাকে বলেছে—

‘নারে চাচী, রাজা জমিদার আমরা কেউ হব না সত্য, তবে রাজা-জমিদার, ধনী-দরিদ্র বলেও কেউ থাকবে না। তুই আমি প্রতিটি মানুষ বাঁচব সমান অধিকার নিয়ে। প্রত্যেকে হব আমরা শোষণমুক্ত। তার জন্যেই তো আমাদের এই লড়াই রে চাচী।’^{৪২}

নাটকে খাদেম মিঞা নামে একজন বাংলাদেশের জমিদারের কথা উঠে এসেছে—যে পাকিস্তানের হয়ে দালালি করেছে, মুক্তিযুদ্ধকে বানচাল করার চেষ্টা করেছে। বাংলাদেশের এরকম বিশ্বাসঘাতক ব্যক্তিদের কথা আগেই আলোচনা করেছি, যারা পাকিস্তানি শাসকের দালালি করে বাংলাদেশের সাধারণ মানুষদের শোষণ করে নিজেদের আখের গুছিয়েছে, মুক্তিযুদ্ধের সময় পাকিস্তানি সেনাবাহিনীর সঙ্গে লড়াই করার সঙ্গে সঙ্গে এদের বিরুদ্ধের সংগ্রাম চালাতে হয়েছিল। এই নাটকেও দেখা যায় এই খাদের মিঞা রোশনারাকে প্রভাবিত করতে চায়। তার কাছে সে প্রচার করে যে, এটা আসলে হিন্দুদের ষড়যন্ত্র, তারা মুসলমান মেরে হিন্দুরাজ কায়েম করতে চায়।

নাটককার তাঁর রচনায় সাম্প্রদায়িক সম্প্রীতির একটি চিত্র তুলে ধরেছেন অজয় ও রোশনারার মধ্যে। বর্তমানে তাদের মধ্যে ধর্মের বিভাজন মিটে গেছে, ব্রাহ্মণ সন্তান অজয় জল ও রাত্রির ভোজন করতে চেয়েছে রোশনারার মতো এক নিম্নবর্গের মুসলমানের ঘরে। এই ঘটনাই নাটকটিকে পরিণতির দিকে এগিয়ে নিয়ে যায়। অজয়ের খাবারের ব্যবস্থা করার জন্য হাসান ও হাবিবকে রোশনারা বাইরের ক্ষেত থেকে কিছু সবজি তুলে আনতে বলে, তারাও তাই করতে বাড়ির বাইরে যায়। ঘটনাচক্রে কিছুক্ষণের মধ্যে পাকিস্তানি সেনা অতর্কিতে গ্রামে হানা দেয়, চারিদিকে ভীষণ অত্যাচার, লুণ্ঠরাজ চালাতে শুরু করে। এই পরিস্থিতিতেই শেষপর্যন্ত পাকিস্তানি সেনার গুলিতে হাসানের মৃত্যু ঘটে। রোশনারা নিজেকে ও তার দুই সন্তানকে যুদ্ধ থেকে নিরপেক্ষ ও দূরে রেখেও রেহাই পাইনি। বিপ্লবের সময় নিরপেক্ষ যে থাকা যায় না—এই সত্য সে বুঝতে পারে। তাই শেষপর্যন্ত সে তুলে নিয়েছে ঘরে লুকান তার স্বামীর রাইফেল দুটি, এই রাইফেলই হয়ে উঠেছে মুক্তির রাইফেল।

বাঁচার শপথ :

মুক্তিযুদ্ধকে কেন্দ্র করে রচিত পানু পালের ‘বাঁচার শপথ’ একাঙ্কটির মধ্যে উঠে এসেছে পূর্ববঙ্গের স্বাধীনতা যুদ্ধের সঙ্গে পশ্চিমবঙ্গে অবস্থিত বাঙালিদের সমানুভূতি। নাটকটির কাহিনি মুক্তিযুদ্ধের একদম শুরুর দিকের। যখন পাকিস্তানি সেনা বাংলাদেশের সর্বত্র হত্যালীলা বাঁধিয়েছে এবং তার প্রতিবাদে বাংলাদেশের সাধারণ মানুষ যুদ্ধ করেছে। তবে

এই যুদ্ধ আধুনিক অস্ত্রের সঙ্গে মানুষের আবেগের। যেই আবেগে জড়িয়ে আছে স্বাধীনতার তীব্র আকাঙ্ক্ষা।

মোহিত বন্দ্যোপাধ্যায় ছেলে বিদ্যুৎ ও ছেলের স্ত্রী দূতিকে নিয়ে কলকাতায় থাকে। প্রত্যেকেরই জন্মস্থান পূর্ববঙ্গে, বর্তমানে তারা বাস করে কলকাতায়। সেই সূত্রেই বাংলাদেশের মুক্তিযুদ্ধ তাদের বিচলিত করেছে। নাটকের কাহিনি শুরু এখান থেকেই। বিদ্যুৎ ও দূতি দুজনেই রেডিওতে বাংলাদেশের সংবাদ শোনার জন্য উদগ্রীব, কিন্তু রেডিওতে ঢাকা স্টেশন আর ধরে না। নাটকের কাহিনি শুরু হয়েছে ২৫ মার্চ থেকে, যেদিন ইয়াহিয়ার ও ভুটোর সঙ্গে মুজিবুরের বৈঠক শেষ হয় এবং ইয়াহিয়া ও ভুটো দুজনেই পশ্চিম-পাকিস্তানের উদ্দেশ্যে রওনা হয়েছেন। তারা আশা করেছিল এই বৈঠকে পশ্চিম-পাকিস্তান পূর্ব-পাকিস্তানের বাঙালিদের সব দাবি মেনে নিয়ে তাদের স্বায়ত্ত্ব শাসন দেবে। কিন্তু পরক্ষণেই মোহিতবাবু একটি টেলিগ্রাম এনে বিদ্যুতের হাতে দেয়, যা পড়ে তারা জানতে পারে পশ্চিম-পাকিস্তান পূর্ব-পাকিস্তানের বাঙালিদের কোনও দাবিই মানেনি, বরং সামরিক শক্তির প্রয়োগ করে সেই দাবি পদদলিত করতে চেয়েছে, অপরদিকে মুজিবুরও বাংলাদেশবাসীদের প্রতি স্বাধীনতার জন্য যুদ্ধের আহ্বান জানিয়েছেন।

বাংলাদেশের মুক্তিযুদ্ধ পাঁচদিন ধরে চলছে, বর্তমানে কোন স্থিতির মধ্যে আছে তার কোনও খবর তারা পাচ্ছে না। অথচ রেডিওতে পাকিস্তানের কেন্দ্র ধরছে, সেখানকার সমস্ত সংবাদে মুজিবুর ও তাঁর অনুগামীদের পাকিস্তানের শত্রু ও বিশ্বাসঘাতক বলে দাগানো হচ্ছে। এই সমস্ত ঘটনা বিদ্যুৎকে উত্তেজিত করে তোলে। এমন সময় ঘরে উপস্থিত হয় অমিত ও সামসুল হক। প্রথমজন পশ্চিমবঙ্গের একজন সাংবাদিক, যে বাংলাদেশের সংবাদ সংগ্রহে গিয়েছিল এবং দ্বিতীয়জন এক মুক্তিযোদ্ধা। এই সামসুল হকের কথাতেই উঠে আসে বর্তমানে বাংলাদেশের যুদ্ধময় পরিস্থিতির কথা। পাকিস্তানি হানাদার সেনারা ঢুকে পড়েছে বাংলাদেশের সর্বত্র। ট্যাঙ্ক, বিমান সহ আধুনিক অস্ত্রে সজ্জিত পাকসেনা চারিদিকে ধ্বংসলীলা চালিয়ে যাচ্ছে। কিন্তু বাংলাদেশের সাধারণ জনগণ তাতে ভীত হয়ে আত্মসমর্পণ করেনি, বরং তারা রুখে দাঁড়িয়েছে, জীবনকে বাজি রেখে নিজেদের স্বাধিকারকে বুঝে নিতে চেয়েছে। তারা গেরিলাযুদ্ধের পদ্ধতি অনুসরণ করেছে, রাস্তা, রেললাইন সহ যাবতীয় যোগাযোগ মাধ্যমকে অকেজো করে নিজেদের সংগ্রাম চালিয়েছে। সামসুল এখানে বাংলাদেশে নিজেদের অঞ্চলের এক খণ্ড মুক্তিযুদ্ধের অভিজ্ঞতা

বর্ণনা করেছে। যেখানে ধরা পড়েছে সাদেক আলী ও তার স্ত্রী আফরোজার নেতৃত্বে সকল গ্রামবাসীর লড়াই ও প্রাথমিক সাফল্য, আফরোজা ও সুফিয়ার আত্মত্যাগ। সুফিয়াকে এখানে বীরাজনা করে দেখানো হয়েছে। পাকসেনা যখন ট্যাঙ্ক নিয়ে গ্রামে প্রবেশ করে তখন এই সুফিয়া মাইন বোমা বুকে নিয়ে ট্যাঙ্কের তলায় শুয়ে পড়ে, প্রচণ্ড বিস্ফোরণে ট্যাঙ্ক ধ্বংসের সঙ্গে সুফিয়া শহিদ হয়। সুফিয়ার মৃত্যুর খবর দ্যুতিকে আহত করে, কারণ এই সুফিয়া ছিল তার বালিকা বয়সের বান্ধবী। দ্যুতি আশা করেছিল স্বাধীন বাংলাদেশে গিয়ে আবার সুফিয়ার সঙ্গে দেখা করবে। কিন্তু তার সে আশা পূরণের আর কোনও সম্ভাবনা থাকল না। স্বৈরাচারী শাসকের সম্ভ্রাস তার বাল্যকালের খেলার সঙ্গীকে কেড়ে নিল।

এই নাটকগুলি ছাড়াও বাংলাদেশের মুক্তিযুদ্ধ নিয়ে পানু পালের ‘বিদ্রোহী বাংলা’, বাসুদেব বসুর ‘আমার সোনার বাংলা’, বিজন ভট্টাচার্যের ‘সোনার বাংলা’ নাটকের নাম পাওয়া যায়। কিন্তু বর্তমানে সেগুলি দুস্থাপ্য হওয়ায় আমাদের গবেষণায় তা আলোচনা করা সম্ভব হল না।

তথ্যসূত্র

১. দত্ত, উৎপল; *নাটক সমগ্র*, পঞ্চম খণ্ড, মিত্র ও ঘোষ পাবলিশার্স প্রাঃ লিঃ, কলকাতা, চতুর্থ মুদ্রণ, আশ্বিন ১৪২২, পৃ-৬০১
২. দত্ত, উৎপল; *ঠিকানা*, নাটক সমগ্র, পঞ্চম খণ্ড, মিত্র ও ঘোষ পাবলিশার্স প্রাঃ লিঃ, কলকাতা, চতুর্থ মুদ্রণ, আশ্বিন ১৪২২, পৃ-৩
৩. তদেব, পৃ-৬
৪. তদেব, পৃ-১৫
৫. তদেব, পৃ-২২
৬. তদেব, পৃ-৭০
৭. তদেব, পৃ-৬০
৮. তদেব, পৃ-৪৪
৯. তদেব, পৃ-৩৪
১০. তদেব, পৃ-৬০
১১. তদেব, পৃ-৫৮
১২. দত্ত, উৎপল; *জয় বাংলা*, নাটক সমগ্র, অষ্টম খণ্ড, মিত্র ও ঘোষ পাবলিশার্স প্রাঃ লিঃ, কলকাতা, দ্বিতীয় মুদ্রণ, আষাঢ় ১৪২১, পৃ-৮১
১৩. তদেব-৮৩
১৪. তদেব-৮৫
১৫. সরকার, অতীক (সম্পা.), *বাংলা নামে দেশ*, আনন্দ পাবলিশার্স প্রাইভেট লিমিটেড, কলকাতা, এপ্রিল ১৯৭২, পৃ-১২
১৬. মাসকারেনহাস, অ্যান্থনী; *দ্যা রেইপ অব বাংলাদেশ*, রবীন্দ্রনাথ ত্রিবেদী (অনু.), গ্রন্থস্বত্ব, ঢাকা, জুলাই ২০১০, পৃ-৩৫

১৭. দত্ত, উৎপল; *জয় বাংলা*, নাটক সমগ্র, অষ্টম খণ্ড, প্রাগুক্ত, পৃ-৯১
১৮. Shalarch, Lisa; *Rape as Genocide: Bangladesh, the Former Yugoslavia, and Rwanda*, New Political Science, 2000, P-94
<https://doi.org/10.1080/713687893>
১৯. দত্ত, উৎপল; *জয় বাংলা*, নাটক সমগ্র, অষ্টম খণ্ড, প্রাগুক্ত, পৃ-৯৯
২০. হাসেন, শফিকুল; *মুক্তির সংগ্রাম পূর্ব বাংলা*, রঞ্জন প্রকাশনী, কলকাতা, কার্তিক ১৩৭৮, পৃ-৬৭
২১. দত্ত, উৎপল; *জয় বাংলা*, নাটক সমগ্র, অষ্টম খণ্ড, প্রাগুক্ত, পৃ-১০৯
২২. তদেব, পৃ-১১৭
২৩. সিদ্দিকী, কাদের; *স্বাধীনতা '৭১*, বঙ্গবন্ধু প্রকাশনী, ঢাকা, দ্বিতীয় প্রকাশ, জুন ১৯৯২, পৃ-১০
২৪. বন্দ্যোপাধ্যায়, দিগিন্দ্রচন্দ্র; *দুরন্ত পদ্মা*, নির্মল সাহিত্য মন্দির, কলকাতা, ডিসেম্বর ১৯৭১, পৃ-১১
২৫. তদেব, পৃ-২৮
২৬. সরকার, অভীক (সম্পা.); *বাংলা নামে দেশ*, আনন্দ, এপ্রিল ১৯৭২, কলকাতা, পৃ-৩৮
২৭. বন্দ্যোপাধ্যায়, দিগিন্দ্রচন্দ্র; *দুরন্ত পদ্মা*, প্রাগুক্ত, পৃ-৩১
২৮. তদেব, পৃ-৩৩
২৯. সিদ্দিকী, কাদের; *স্বাধীনতা '৭১*, প্রাগুক্ত, পৃ-৫৮৬
৩০. তদেব, পৃ-৫৯০-৫৯১
৩১. বন্দ্যোপাধ্যায়, দিগিন্দ্রচন্দ্র; *দুরন্ত পদ্মা*, প্রাগুক্ত, পৃ-৫৪
৩২. তদেব, পৃ-৬৬

৩৩. তদেব, পৃ-৮০
৩৪. তদেব, পৃ-৮৬
৩৫. তদেব, পৃ-১০২
৩৬. তদেব, পৃ-১৬২-১৬৩
৩৭. তদেব, পৃ-১৭০
৩৮. তদেব, পৃ-১৭১-১৭২
৩৯. দে, অনিল; *দূর্বীর বাংলা*, দিলিপ বন্দ্যোপাধ্যায় (সম্পা.), অভিনয়, দ্বিতীয় বর্ষ, ৩-৪ সংখ্যা, এপ্রিল-মে ১৯৭১, পৃ-২৩৭
৪০. তদেব, পৃ-২৩৯
৪১. মিত্র, স্বপন কুমার; *মুক্তির রাইফেল*, সুনীল দত্ত (সম্পা.), একালের একাংক, চতুর্থ খণ্ড, জাতীয় সাহিত্য পরিষদ, কলকাতা, ১৩৮০, পৃ-১১৫
৪২. তদেব, পৃ-১২৩